

東
華
續
錄

光緒十六

臣朱壽朋敬編

臣汪錫增恭校

五月丙辰張佩綸奏竊臣恭閱邸抄三月十四日奉 上諭朕奉 慈禧端裕康慶昭和莊敬皇太后
慈福端佑康頤昭豫莊誠皇太后懿旨惇親王奕誼等奏遵 旨相度 太廟中殿位次請飭廷臣會議
一摺據稱我朝自順治初年創立廟制迄今 列聖廟宇中殿龕位已與九間之數相符等語 穆宗毅
皇帝 孝哲毅皇后神牌升祔供奉位次鉅典攸關著王大臣大學士六部九卿翰詹科道虔詣 太廟
敬謹相度後會同惇親王奕誼等妥議具奏欽此仰見我 皇上詳求禮制博采羣言之至意臣謹案
本朝之制典與歷代異歷代賢君諡辟或數世一作或同世一作故親盡而祧我 朝 列祖 列宗
聖聖相承皆當為百世不遷之廟欲酌古準今垂諸久遠非立 太宗文皇帝世室不可伏考國語及祭
法皆言殷人祖契而宗湯據商頌則湯實稱祖故賀循云殷有二祖三宗是殷之特廟蓋有四矣朱子序
殷武之詩曰高宗中興為百世不遷之廟不在三昭三穆之列此詩則廟成而祔祭之詩劉歆曰周懿王
時始立文世室於三穆之上孝王時始立武世室於三昭之上諸儒多是其說由此言之殷以一祖三宗

有功德特立廟周以文武有功德特立廟我朝太宗文皇帝有功德特立廟實至當不易之經也說者慮特立一廟嫌於近祧顧何楷有言武丁當世數未盡時必仍居七廟中及親盡應毀之日乃始遷其祖於新廟與七廟同享祀不與羣祧等列然則在七世中則祔於太廟以明有親在七世外則創立新廟以明有功廟有定數宗無定數家語引孔子曰諸見祖宗者皆不毀可爲明證至廟宜立於何所考劉瑾之說謂中宗當穆高宗祖甲當昭各立其廟於太祖廟之兩旁今同堂異室與古制少異若於中殿垣外旁建世室已居羣昭穆之次不足以示尊崇且中殿於後既非古式卽相度規模亦嫌未稱似宜展後殿兩旁短垣左右各建世室既居昭穆廟之上仍在太祖廟之旁與文世室在西北武世室在東北之制相合地非神路所經儘可鴻規大起將來世室告成奉太宗文皇帝孝端文皇后孝莊文皇后神牌於左爲世室一切禮儀悉視中殿其中殿龍位則自世祖章皇帝孝惠章皇后孝康章皇后神牌以次遞遷恭奉穆宗毅皇帝孝哲毅皇后神牌於第九室揆之古今禮制頗無窒礙如蒙飭下王大臣等詳核定議請旨施行庶上慰列聖在天之靈下綿萬世無疆之祚我朝制度直與三代同風矣再事關升祔大禮原宜博采羣議考證異同但傳說不一所執各殊若不同別是非無以折衷至當或擬展中殿爲十一室意謂歷代增置具有成規事既易行工亦較省不知

天子七廟一壇一壝定爲九室無可議增自晉人謂廟以容主爲限無拘常數故至元帝明帝皆十室至穆帝簡文帝皆十一室唐宋金元沿爲故事或多至十八室然詳繹當日增展之由則皆以兄弟相及者合爲一代下則世次等倫雖分昭穆上則高曾未盡雖卽祧遷故雖狹小其制猶得以室逾九間數仍九代爲解倘今日踵而行之不獨與古人立廟之制未符亦且與後世增室之意未合況因陋就簡本係叔季衰風設當重熙累洽之朝則自十一室後以兩遞加必至無地可容鼎俎未展太廟爲十二室孝宗升祔而東室尙虛朱子以爲非祝延壽康之意深不然之酌理衡情無適而可國家敬修祀典當準萬世不易之經不當爲一時權宜之計若苟且遷就但顧目前度聖人設禮之心當必不願出此也或又擬於中殿旁別建九楹將中一間爲穆宗毅皇帝新廟意謂前殿爲廟中殿爲擬似乎父子異宮不失禮意而歲時合食亦與古義無乖然禮名升祔不入太廟尙得謂之祔乎在昔殷盤庚時陽甲別出爲廟漢光武時孝成別出爲廟晉主似循議惠帝別出爲廟唐主陳貞節蘇獻等議中宗別出爲廟是數王者本無功德於民當時建議別祀禮家猶且非之欽惟我穆宗毅皇帝削平大難承烈顯謨他日當定爲功德之廟百世不祧今市當升祔豈宜因中殿九室已盈擬建新廟轉類於殷漢晉唐舊事乎我朝經學昌明禮儀詳慎王大臣等欽承懿旨必能斟酌盡善仰副聖謨而臣竊思過慮誠恐衆論

紛紜淆於疑似不得不亟爲之辯昭穆之次自漢以來紛如聚訟何洵直張璪之論朱子之圖詳且盡矣然皆爲都宮異議者言之若同堂異室而拘於昭常爲昭穆常爲穆必至子居父上曾在孫先極其流弊實有如馬端臨所慮者惟宋陸佃謂周以后稷爲太祖王季爲昭文王爲穆武王爲昭成王爲穆康王爲昭昭王爲穆至穆王入廟王季親盡而遷則文成昭宜居昭位武康穆宜居穆位其言著於禮志最爲明晰臣再四尋繹如佃所云昭穆者父子之號方其爲父則稱昭取其昭以明下方其爲子則稱穆取其穆以恭上實較昭穆定名之說爲長如佃所云同堂合食穆居父行則宜爲昭昭居子行則宜爲穆又較昭穆定位之說爲長況壇立於右墀立於左以周制考之太王親盡去右壇而爲墀王季親盡去左墀而爲壇左右遷徙無嫌倘以佃爲不足據豈昭必越壇而經墀穆必有壇而無墀乎我朝郊廟位次東西互殊實與陸佃之說相合誠使中殿龍位以次左右遞遷並非創爲新論仍係率由舊章應請飭下王大臣等一併核議以垂萬世之式 上諭朕奉 慈安端裕康慶昭和莊敬皇太后 慈寧端佑康頤昭豫莊誠皇太后懿旨翰林院侍講張佩綸奏敬獻 升祔禮儀以備採擇並昭穆位次及考證異同各摺片著王大臣大學士六部九卿翰詹科道歸入悻親王奕訢等前奏請飭廷臣會議摺內一併妥議具奏○奕訢等奏光緒三年四月初六日內閣奉 上諭朕奉 慈安端裕康慶昭和莊敬皇太后 慈

福端佑康頤昭豫莊誠皇太后懿旨惇親王等奏此次敬修 玉牒應入行款如何恭繕之處未敢擅擬
請 旨遵行一摺著軍機大臣大學士會同 玉牒館總裁等妥議具奏欽此 玉牒體
制以統緒爲尊以輩分爲序 帝系首書 聖祖世系以及位下房分 皇帝居中恭繕位下各房分均
按昭穆繕寫次序 列祖統緒 聖祖相承一脈延綿至大直檔統按輩分每一輩首書 皇帝自近
支推及遠支均以房分爲序每屆敬修之期恭照體裁將十年內上自 皇帝下至閒散宗室所生之女
過繼歸宗等項事故敬謹纂入橫檔相同體例昭然有條不紊誠萬世不易之楷模也 等因奉 諭旨
妥議此次恭修 玉牒有應行纂入者亦惟恭照歷屆敬修 玉牒體裁悉心酌核首重 列聖寶系統
緒次及直檔橫格分晰宗支輩分敬謹恭繕體式三本連館臣原遞三本一併恭呈 御覽 上諭朕奉
慈安端裕康慶昭和莊敬皇太后 慈福端佑康頤昭豫莊誠皇太后懿旨軍機大臣大學士總裁王
大臣等遵議 玉牒體式一摺此次恭修 玉牒體式著照所議敬謹繕寫○諭職容奏假期屆滿薦疾
未痊懇請開去差使並請停俸一摺職容著准其開去一切差使安心調理加恩賞食全俸○沈葆楨奏
浙江鹽哨羅烽榜越境伺劫訊明示懲下刑部知之○丁巳以文煜爲內大臣奕劻爲左宗人奕綱爲正
黃旗蒙古都統○戊午左宗棠奏准烏魯木齊領隊大臣錫綸咨稱准部咨光緒三年正月二十日奉

旨古城領隊大臣著錫綸兼署欽此遵查古城舊制未復並無滿兵上年咨委統帶各營現已另有調遣及應歸併擬俟經手清釐仍回烏魯木齊本任咨請代奏前來臣查上年咨委錫綸統帶各營及金順奏請兼署古城領隊均爲遏賊北竄防護運道起見現在古城以東臣已另派防營擇要填紮前此撥歸錫綸統帶之西征馬隊已另有調遣即金順派撥節制之健銳馬步各營正當遵旨裁撤歸併古城舊制未復既無滿兵錫綸應仍回烏魯木齊領隊本任毋庸兼署古城領隊以昭核實報聞○左宗棠奏前奉寄諭英廉奏請飭甘省撥兵換防等語塔爾巴哈台官兵向由甘省調撥現在道路疏通自應仍由甘省撥往以符舊制著左宗棠派撥精壯兵丁五百名配齊器械迅飭馳赴塔爾巴哈台以資換防將此諭令知之欽此臣維甘肅標營額設弁兵原本不少承平時例應派赴新疆換防自逆回倡亂以來陝甘遍地糜爛餉糧乏絕間有未經失守之區制兵亦多飢潰標營久成虛設不可覆按即於督標額設弁兵三千五百餘員名臣查龍後肅思訓練以資表率亦只飭中軍挑存一千五百餘名未能遵議復額也此外各標營僅准陸續挑募以供差操略存舊制誠以關外事務方殷所調客軍未可遽撤餉糧無可勻濟勢難兼顧額兵且全隴土曠人稀兵變之餘戶口凋零就現存壯丁盡力耕墾且因不足欲其應募入伍勢更爲難此制兵暫緩復額之實在情形也塔城制兵換防現在實無可撥一俟軍務大定舊制漸復再當

徐議及之報聞○己未諭毓楠等奏應行急修各工請派大臣查驗一摺 孝東陵 隆恩殿 景陵西
明樓等處均有虧朽滲漏情形著派德春將應修工程敬謹查驗奏明辦理○諭正白旗滿洲都統恭親
王等奏大員之母年屆百齡一摺吏部左侍郎恩承之母許氏年屆百齡精神強固洵為熙朝人瑞加恩
著南書房翰林書寫匾額一方賞給以示殊榮所有例應旌賞之處仍著禮部核議具奏○派察杭阿慶
陞賀壽慈潘祖蔭為扈賚 王傑大臣○壬戌諭御史鄧慶麟奏軍功勞績保舉初任候補道府直隸州
知州請變通章程不准酌補題調要缺一摺著吏部議奏○諭御史鄧慶麟奏開明回鑲藍旗印務翼長
文忠與護軍校英全國春互相勾結於應放各旗官兵班費等項錢文及班賞銀兩均有朦混剋扣情弊
以致物議沸騰並文忠與怡親王係屬姻親以修葺該王祠堂為名將各旗官兵俸餉藉端勒扣請旨飭
查等語著派寶璽崇綺將該御史所奏各節確切查明據實參辦以重營務○譚鍾麟奏潼關商稅驟難
復額仍請照前儘收儘解下戶部議奏○癸亥黎培敬奏省城舊有軍火局附近南城地勢頗高因牆屋
疊疊守謹歲本年三月二十九日初更後大風暴雨雷霆震爍竟將局牆壓倒雷火電光引動火藥轟然
一聲地俱震動臣當督同司道及閩城文武員弁冒雨撲救火勢藥力猛烈異常不可嚮邇幸地高隔絕
兼值大雨如注尚未延燒民房事後查計焚燬火藥軍裝價銀約值十餘萬兩震塌附近民房八十餘戶

歷斃男丁一口壓傷男婦六口據善後局司道具詳前來臣查此次天災實出意外人力所不及防看守弁兵應免置議所有被災各戶已飭善後局查明按次發給恤銀分別賑卹俾免失所得旨所有被災各戶卽著該撫飭屬妥爲賑卹毋使一夫失所○以鄆都縣知縣劉樹義信任家丁率封引鹽交部議處○甲子李鶴年奏臣查十字河發源費縣分水嶺由東南而來匯合彭口山河及諸坡積水穿運而過形如十字河身在夏鎮運南二十餘里兩岸沙山屹立昔年運道通行之日歲有動帑撈沙一款自豐工漫口河已淤墊追後辦理海運遂不復撈沙二十年來已成平陸臣親履其地涉河底登沙山查看該處距微山湖甚近因運道淤墊糧艘北上必須由湖入運近年湖底日高湖水日淺又值雨水稀少今年湖水更小於去年而歷考舊章微山湖蓄水原爲溜注江南中運河而設現在漕臣文彬已函札交馳飭運河道開閘放水臣與該道王化堂熟商殊難開放則湖水更淺去年漕船入湖起剝今年恐起剝亦虞淺阻再三籌議惟有將十字河挑挖深通俾糧艘仍行故道微山一湖專事蓄水偶遇水旱河淺再行放水通運則濟甯以南可以暢行無阻且上年挑挖仰淺聚林今年又挑魚浦二汛自濟甯至夏鎮二百餘里均已挑通不復假道蜀山南陽昭陽湖路獨此數十里咽喉梗塞不通體察情形實難再緩惟有仰懇天恩俯准興挑十字河飭道屬核實勘估今年秋冬間奏明撥款動工明年南路運河糧艘均由故道再將

十字河通南彰口各關次第修整啟閉蓄洩可憑人力則此後辦理河運庶有把握矣得 旨如所請行

○李鶴年奏前請撥銀二萬五千兩挑挖魚浦二汛河身臣到濟時正在興工閘伍完竣即親往查看由濟甯登舟順流而南歷去年所挑新伸師東四閘皆通行無阻其緊接棗林之南陽關迤南即運河屬屬現挑之工臣登陸逐段巡視尺寸寬深尙皆如式因正在築壩不能前進仍掉舟由獨山湖缺口入昭陽河乘風揚帆直達微山湖上游即泲河屬屬之夏鎮新工已是山東江南分轄當登陸率同運河道王化堂泲河同知何師范逐段查看已竣之工波流蕩漾試探深通未竣之工丁夫操杵掘鉤亦皆踴躍兩屬工段月內約可蒞役本年漕船入境自夏鎮至濟甯無復涉河風波之險惟夏鎮迤南之十字河實爲運道關鍵臣親往查看淤墊尤甚一切情形另片詳細陳明臣勘工已畢現值黃河桃汛春水方生急宜督率修防已於十七日馳回汴省報聞○乙丑夏至節大祀 地於 方澤命載勛恭代行禮○諭給事中郭從矩奏請飭整頓士習一摺嚴廷考試官如何整齊嚴肅遵守禮法乃本年殿試竟有貢士爭取題紙任意喧譁實屬不成事體嗣後著禮部先期出示剴切曉諭務期恪遵功令毋許再蹈故習如有不守規矩者即著指名嚴行參辦至本年會試接場之人甚至擁擠闕殿近來各省鄉試及府廳州縣童試亦有藉端滋事等情均應實力整頓嗣後遇有此等案情務宜從嚴懲辦毋稍寬縱並著各省學政於接臨各

郡時督率教官認真約束以端士習○丙寅予榮城縣節婦于趙氏烈婦于李氏旌表○丁卯予故休甯縣殉難紳士孫日贊楊大容建祠○諭左宗棠奏官軍會克吐魯番城詳細情形一摺本年三月間提督張曜等會師追勦督率各軍由哈密巴里坤分道疾馳奪據賊壘攻拔弋克騰木及關展等城乘勝復將連木沁勝金臺等處次第攻克擒斬甚多賊衆不支由西北竄向吐魯番城官軍會合勦擊馬步並進當將吐魯番滿漢兩城同時克復收撫降回均令各安生業左宗棠籌畫調度均合機宜張曜等迅赴戎機勦辦得手此次出力員弁自應量予獎勵廣東陸路提督張曜著賞給一等輕車都尉仍兼一雲騎尉世職提督劉占彪孫金彪均著賞給頭品頂戴宋賢璧何玉超均著賞穿黃馬褂李玉春著交部照頭等軍功例議叙總兵王明泰李永芳均著以提督儘先題奏副將楊壽山著以總兵交軍機處記名簡放並賞加提督銜參將喬鳳友著以副將儘先補用並賞加總兵銜游擊孫萬林著以副將儘先補用石玉山著賞給濟勇巴圖魯名號林秀全著以參將儘先補用並賞給額勇巴圖魯名號都司王明蘭姜成立均著以游擊儘先補用並賞加副將銜于總孟廣山著以守備儘先補用並賞加都司銜總兵黃祖福著免繳捐復銀兩參將蔡玉盛著以副將儘先補用並賞換噴爾薩巴圖魯名號游擊蔡義興著以參將儘先補用並賞給懋勇巴圖魯名號都司谷振傑著以游擊仍留原省儘先補用並賞給參將銜牟春陽廖登第

均著以游擊儘先補用並賞加參將銜守備卅九成著以都司儘先補用並賞加游擊銜把總留福巷著以守備儘先補用並賞換花翎其餘出力員弁兵勇著准其提案保獎毋許冒濫該部知道○戊辰諭額勒和布等奏特參勒索蒙古各旗銀物之侍衛請行嚴加議處一摺頃等侍衛孝順率派致祭已故貝子通噶拉克瓦齊爾行抵該游牧每日索取布疋銀兩至致祭時飭令備送衣服銀物並有若不預備卽不致祭之語經該台吉等交給銀兩綑段等件始行致祭該員經過喀爾沁等臺每臺需索羊隻等項折價銀兩似此任意騷擾貲婪不職殊出情理之外係予嚴加議處不足蔽辜孝順著卽行革職交部治罪其勒索蒙古各旗銀物並著追繳給還○己巳諭此次軍政卓異記名人員除文忠一員毋庸預備召見外所有頭等侍衛維慶等二十三員著於本月十七日起按照名次先後每日一員於寅刻赴乾清門伺候召見如是日未經召見仍於次日預備俟召見後其次應行召見之員再行接續預備其餘各員以次遞推○古尼音布玉莖奏奴才等因協領德凌阿營總防禦海明阿各帶隊伍值賊滋擾並不追剿堵擊當經具摺奏參革職訊辦承准軍機大臣字寄光緒二年九月二十二日 上諭德凌阿海明阿著一併先行革職提省訊辦如有退縮情事卽行據實嚴參等因欽此遵寄信前來奴才等遵卽咨行三姓副都統等衙門將已革協領德凌阿已革防禦海明阿派員押解到省隨督飭司員逐加研審實無退縮情弊

應卽擬結已革協領德浚阿已革防禦海明阿各帶隊伍剿捕賊匪聞有警急並不立時追擊以致各屯鎮俱遭滋擾雖訊無退縮情弊究屬畏葸無能德浚阿海明阿均請從重發往軍臺効力贖罪以肅軍律而儆效尤下刑部議奏○兩○庚午諭沈葆楨何璟丁日昌奏新設海疆要缺知府揀員請調一摺福建新設臺北府知府員缺著准其以江蘇海州直隸州知州林達泉試署○諭沈葆楨等奏殉難大員懇准建祠立傳並可否予諡一摺已故護理江蘇按察使蘇州府知府朱鈞於咸豐十年在江蘇省城力戰被害業經奉旨議卹茲據奏稱該故員服官蘇省督政頗多遺愛在民該省紳士呈請奏懇恩施等語朱鈞著准於江蘇省城捐建專祠由地方官春秋致祭並宣付國史館立傳至所請予諡之處著禮部議奏○辛未諭四川順慶府知府李書寶廣西平樂府知府文廷琛陝西興安府知府楊煥均著開缺送部引見○沈葆楨吳元炳奏准禮部咨光緒元年六月初三日內閣奉 上諭御史陳毅奏江蘇高郵州醫士郭咸宜民人朱長春孝行純篤諸生章炳諧安貧樂道請飭查獎等因欽此移咨欽遵辦理等因當查高郵州已故孝子郭咸宜業於同治九年經升任撫臣張之萬彙案具題奉部議准旌表在案欽奉前因卽經行司查取朱長春等事實核辦去後茲據高郵州知州姚德彰移學查明增生章炳諧實係安貧樂道遺具事實冊結由揚州府詳經署江甯布政使勒方鐸覆查無異詳請具奏前來 臣等伏查高郵州增生

臯卿諸性敦孝友學粹詩書尺步繩趨不狃流俗嘉言懿行祇切潛修甘澹泊以終身廣教施於後進洵
屬安貧樂道宜邀曠典表揚除冊結咨部查核並飭將朱長春查明事實造具冊結另行詳辦外謹合詞
恭摺具奏下部議奏○壬申予貴州遵義等府屬離間紳劉秉昭等節烈婦女劉王氏等旌卹○甲戌
諭前因山西災歉情形經前任巡撫鮑源深奏出當經准照所請開倉賑濟會國荃到任後復諭令妥籌
撫卹茲據奏稱該省上年秋稼未登春夏又復亢旱秋苗未能播種各屬自開倉放賑飢民就食者多倉
穀不敷亟須籌款賑濟等語覽奏情形殊殷軫念加恩著照所請即將該省本年應解京餉劃留銀二十
萬兩由會國荃飭屬採買糧米派員查明各府州屬被災輕重分別賑卹仍督飭該地方官認真妥辦務
期實惠均沾毋任一夫失所其被災各屬有應調緩錢糧以資接濟者並著分晰查明奏請恩施用副朝
廷愍念民艱至意○諭敘李元華加一級紀錄三次○諭德椿奏遵查專案工程請派員承修一摺所有
孝東陵 隆恩殿工程著派本年承修另案工程之大臣徐桐烏拉喜崇阿敬謹承修○諭何璟丁日
昌奏請將殉節之道府各員予諡建祠等語前署福建延邵建道袁績懋代理延平府事候補知府金萬
濟於咸豐年間先後勦辦粵匪力竭捐軀業經奉 旨優卹茲據該督等奏稱袁績懋著理道袁深得民
心力保危城死事最烈著准其於祖籍江蘇常州府及死事之福建順昌縣地方捐建專祠所有同時殉

雖各員弁生監家丁人等一併附祀以彰忠節至所請將袁績懋及金萬清予諡之處著禮部議奏○以
滄州紳參將銜候選游擊劉鳳舞疊次平糶捐散錢米賞加副將銜○戊寅李元華奏前奏接築賈莊
上游直隸境內黃河南岸長堤以資聯絡捍衛民田當經派員添夫修築完竣現已飭委署交沂曹濟道
王作孚前往驗收在案查此項堤工自直隸東明謝寨起經長垣境至河南考城縣界堤止綿長七十餘
里議者以爲堤均直隸應轄工程理宜分勞而以該二省沿河居民雖利害攸關而山東曹濟之民設有
疏虞被害最重且二百餘里長堤獨留此一隅隙地未設宣防上爲通工百密一疏之役患下爲山東江
南地方之隱憂是以無分畛域不避嫌疑一律認修然又當此庫藏空虛如七十里長堤全行僱夫修築
則爲費甚鉅熟籌兩全之法計惟調派各營移防河之事酌給津貼以資鼓勵此外再令酌
派民夫協同從事端緒既不繁難經費稍可減省現在工程甫竣所需用款尙未據該委員等核明稟報
惟查此項新堤既經告成防守應有專司刻下伏汛將臨水勢日見漲發亟應認真防護至以後常年修
守亦須專責有人東省各營勇丁爲數無多而應防本境各工南北兩岸共有四百餘里已屬不敷分布
今若以直隸境內之堤再由東省派營防汛實屬兼顧爲難臣夙夜籌思實無良策惟有仰懇 天恩俯
准 勅部核議應如何體察情形責在何省派隊設防常年修守或卽責成各該地方官督同民夫隨時

設防修護俾要工藉免疏虞下部議奏○己卯頒給四川成都府江神廟匾額○諭何璟丁日昌奏福建省城驟遭大水現籌撫卹等語本年五月間福建省城南水過多山水驟發兼之海潮上泛城內外水深五六尺至丈餘不等業經何璟等督率員弁將被難居民救出安插該省連年猝被水災民情困苦殊堪矜憫著何璟等督飭地方官妥籌賑卹毋任一夫失所省城內外人民田禾有無傷損並上游各府縣水勢若何是否成災著卽查明具奏其應如何籌撥款項採買米石以資賑濟之處並著迅速辦理用副朝廷廑念災黎至意○辛巳李元華奏截止關卡停免米糧盤稅期下戶部知之○賞額爾慶額副都統銜作為古城領隊大臣以崇志為涼州副都統○以安東城守協防外委趙良彩捕剿殞命交部照陣亡例議卹○壬午欽奉 慈安端裕康慶昭和莊敬皇太后 慈禧端佑康頤昭豫莊誠皇太后懿旨禮部題皇帝萬壽聖節正值齋戒之期援照成案請親選一日行慶賀禮等語皇帝萬壽著於六月二十六日行慶賀禮嗣後卽照此有行○諭六月二十六日王公百官均著在乾清宮行禮應如何預備之處著該衙門查照舊例具奏○譚鍾麟奏防邊將士堵剿宣力有年懇恩給獎奉 旨著准其擇尤保獎毋許冒濫○諭劉長佑潘鼎新奏擒獲積匪請 旨斥革正法等語滇省自肅清以後民黎獲藏軍火久經嚴禁乃平越縣屬猶有素行不法之捐職同知張旭中聚眾聚聚擅殺平民迭經官軍查辦復敢恃險抗拒傷斃

兵丁實屬不長法現據劉長佑等派軍進剿攻破匪寨立將該匪張旭中擒獲地方一律安謐劉長佑等卽飭原派員弁迅將善後事宜妥爲辦理所有捐納貴州試用同知張旭中著卽斥革就地正法以昭炯戒該部知道○諭劉長佑潘鼎新奏回匪糾衆搶劫現經殄除請將出力各員獎勵一摺尋何回匪李老八王發有等膽敢煽誘死黨百餘人於本年二月間突至昆明縣屬之老玉屯地方縱火焚掠經知縣王履亨會同防營前往圍剿賊衆退屯鐵峯薙拚死抗拒官兵乘夜進攻斃賊多名生擒匪首王發有等正法剿辦尙爲迅速仍著劉長佑等飭令該地方文武緝逸匪以靖根株此次出力之同知銜昆明縣知縣王履亨著賞加運同銜賞戴花翎生員彭之翰著以從九品不論雙單月選用軍功劉華庭等均著賞給五品藍翎陣亡隨丁李朝榮嚴福均著照兵丁陣亡例議卹該部知道○癸未左宗棠奏已革副將徐定邦帶罪留營卓著戰功懇恩免其發遣開復原官翎枝允之○延煦奏奴才前因遵查圍場將帶印公出日期奏明在案拜摺後卽於四月初四率領員弁兵丁由郡起程初六日抵唐三營適圍場總管春山率屬來迎接見後隨同前進初七日入崖口祇謁 東廟宮後進圍取道罕特莫爾川由正藍正白二旗地界將應行查勘各圍次第周歷於十六日抵齊爾哈朗廟祇謁 西廟宮後出圍十九日旋署統計往返十有六日伏查圍場全局經前任都統瑞聯親歷詳查酌擬章程專摺具奏復經吏部等會議擬奏

均已奉 旨允行惟烏拉岱之三四道川并布嘎之費既山因言事者有所指陳始蒙 諭令奴才詳查具奏奴才於十一日行至并布嘎見有埋立木椿詢之總管春山據稱上年瑞聯定界於此奴才遂將該處山形地勢逐細踏看木椿迤東爲大礮子川北連克勒溝皆已放之地木椿迤西卽爲并布嘎西北通布敦川西南連伊遜川而風水山適居其中爲行圍必不可少之地業經全行封禁所謂費既山者乃并布嘎界內之東南小岔若其地不封則其界斷不能清將來布敦伊遜二川勢必至有所侵占此費既山不可不騰之明證也十二日抵烏拉岱停車一日率領刑部員外郎春齡員外郎高士龍總管春山同至三四道川周迴繞勘得兩川相比自南至北約各十餘里有土山橫互其間爲三圍套連之地三圍者曰威遜格爾曰巴彥額勒棍郭曰巴彥博勒嘎素汰皆正白旗圍場 列聖秋獵所常臨者也查七十二圍分列八旗今若三圍不騰則正白旗圍場十一處全行勘放八旗僅存其七實於我 朝體制有乖而兩川實三圍正地並非所謂邊荒此三四道川不可不騰之實在情形也再查此次議騰之地約共三百餘頃而上年丈出餘地與入官熟田不下千頃足敷撥補之需此次騰圍再能示以體恤辦理得人萬不至如庫克吉泰之燒房逐民滋生事端相應請 旨將烏拉岱之三道川四道川并布嘎之費既山仍照瑞聯原奏一律騰留無庸更改實屬有裨大局無害民生至新設同知司獄各衙署奴才遂加踏看惟

克勒溝地方形勢平正右東圍已放地內最爲適中擬卽建立於此其西圍巡檢衙門卽令該署同知探擇地方詳明辦理得 旨如所請行

大月乙酉朔諭李鴻章奏總官積勞病故懇請優卹並將事實宣付史館一摺已故廣東陽江鎮總兵馬復震才兼文武前在曾國藩左宗棠軍營剿辦粵捻各匪轉戰安徽浙江陝西等省卓著勦勦旋隨李鴻章効力海疆積勞病故深堪憫惻馬復震著交部從優議卹並將該故員事實宣付國史館立傳以慰忠魂○崇厚奏欽奉 寄諭御史劉錫金奏請興鹽利以濟兵食一摺著崇厚體察情形悉心籌畫妥議具奏等因欽此查東三省自國初至今從未辦過鹽課其中窒礙難行之處節經歷任將軍奏明在案所以同治六年原任將軍都興阿因力籌練餉奏請創辦鹽課亦未議及鹽課今若按照各省配引徵課誠如聖諭奏省鹽斤向未徵收稅課創辦恐亦不易飭令體察情形奴才悉心籌畫當此練兵籌餉之時雖不能速辦鹽課亦必須整頓鹽課查東三省及蒙古各王旗所有食鹽均仰給於奉省沿海各鹽灘是奉省產鹽不爲不多銷鹽亦不爲不廣第創辦之始立法未周密以致日久弊生偷漏侵漁均所不免且原定鹽課數目太微計鹽六百斤爲一石抽收東錢一弔文現以省城時價而論每石係售東錢十四弔四百文卽使酌量加釐不致有礙民食當經奴才崇厚遴委委員前赴各灘逐細詳查酌核擬議現於省

城設立籌餉總局並派旗民各員分往產鹽各州縣設局整盤每鹽一石收東錢一吊四百文仍以八成充公二成作為局員薪水以及灘長書手局丁巡役工食並紙張一切之需並准灘戶每石加價東錢六百文以恤商力雖較之原定數目不無加增而核計每鹽一斤所收鹽盤不及制錢一文似此酌量變通練餉既少有裨益即鹽價亦不至驟昂惟從前雖有每石八百斤之說均係私斗私秤每石加至八九百斤不等實不均平現擬仍照原定六百斤為一石之數頒給官斗責成斗紀於售鹽時按斗過量免滋流弊至嚴杜偷漏等事現已設立三連鹽票蓋用奉天總督關防發交局員無論何項買鹽人等均令到局照數抽釐方准持票赴灘買鹽並遴派得力員弁帶兵巡查倘或無票運鹽及鹽票相離者一經查出即照私鹽辦理並令各灘戶公舉灘長以便隨時驗票發鹽及按季將時價公議報官定明以免任意低昂藉昭公允現擬議章程派員試辦尚須隨時體察情形酌度定議應俟辦有成數再行報部查核以立定章而垂經久下戶部知之○內戎藩鼎新奏前准部咨各省州縣佐雜實任調署別缺仍照向例每年統計不得逾十分之二候補委用試用人員除委署無人之缺及暫時代理毋庸核計外如委署有人之缺州縣與佐雜分計每年各不得逾十分之一以示限制等因惟查滇省地居邊遠兵革之餘率皆廢燭餘匪散練強悍成風措置稍有未宜變故即因之而起所恃地方牧令相機撫輯庶可弭患於無形乃或

甫經到滇而未諳情形或地處邊要而不習事務或才具可用而不耐烟瘴與其僨事而撤參孰若先事以審慎且警後一切事務煩難諳練之員不可多得或調辦營務或襄理局差或委充文案不得不量為變通以期集事況地方瘠苦所在皆然赴任與當差既無所謂偏枯亦無所謂調劑查雲貴兩省各班補缺章程均准變通辦理原以邊陲初靖情形各有不同著事與補缺無非為地方起見事同一律可否仰懇 天恩俯准將滇省委署章程按照補缺暫予變通俟軍事大定善後告竣再行遵照辦理奉 旨著照所請吏部知道○予華亭烈婦黃管氏旌表○丁亥何璟奏籌辦賑卹由官發價採購平糶米石暨招商運米情形報聞○古尼音布等奏吉省緝捕馬賊獲犯錄供詳報到日核與律符卽飭就地正法歷經照章辦理在案近查各路帶兵員弁或擒獲夥匪指為盜首或殺斃一賊稱擊多名希冀邀功難免無虛報情事若不嚴加整頓誠恐日久相沿致滋流弊奴才等擬請嗣後各屬拏獲盜犯無論首要夥匪飭卽派員押解一名交司審訊根究虛實其臨陣格斃各犯並令割取左耳送省查驗庶昭核實報聞○庚寅諭御史鄧華熙奏廣東省北被水大概情形請旨飭查妥籌賑撫各摺片據稱廣東北江長隄綿亙為清遠等縣屏障聞本年四五月間雨水過多江河氾濫石角圍隄決口百數十丈此外河隄復潰塌十餘處又聞連州於五月間山水陡發居民淹斃萬餘人訓導康贊修漂流不知下落四野田廬均被淹沒等語

著該督撫卽行查明詳悉具奏並卽勘明被災輕重妥籌撫卹毋任一夫失所一面將河隄決口速籌堵築以資捍衛至所稱廣州府城立有惠濟義倉請飭酌提利息銀兩以爲辦賑之需交公正紳士經理並停免由鄰省至該省米穀捐展飭船廠不得創立名目搜抽米船船頭銀禁止省河私設米埠把持糧價諸弊均著該督撫酌度辦理○諭本年京師入夏以來雖經得有雨澤未能霑足現在節近大暑農田待澤方殷允宜虔申祈禱朕於本月初八日親詣 大高殿拈香 時應宮著派惇親王奕誩 昭顯廟著派恭親王奕訢 宣仁廟著派惠郡王奕詳 凝和廟著派貝勒載治同於是日分詣拈香○諭古尼音布等奏革員畏罪潛逃請飭嚴緝一摺已革記名驍騎校披甲成安因案提訊輒敢在保潛逃顯係畏罪遠颺亟應嚴緝到案著步軍統領衙門順天府五城一體嚴拏務獲究辦○諭御史李桂林奏職官勒索鹽商請旨飭查嚴辦一摺據稱河南安陽縣知縣與典史賦性貪婪視鹽商爲魚肉任意勒索以致商人歇業鹽引滯銷現聞直隸河南州縣紛紛效尤各商稟控之案層見疊出等語近來鹽務疲敝全賴地方官潔己奉公善爲經理似此情形殊屬不成事體著李鴻章會同李慶翱將各該商稟控之案秉公查辦毋稍輕縱其安陽縣知縣等如何勒索商人之處並著確切查明據實參辦○諭此次軍政卓異應行預備召見之護軍參領明魁著於初十日預備圓明園營總聯恩著於十一日預備○左宗棠奏甘肅退

苑民戶領地承糧一石以上卽以領照日爲入籍按冊內註明之兄弟子姪准其一體應試四五斗三斗者下次科試及歲試准其報考庶廣招徠下部議奏○左宗棠奏甘省回生鄉試向未另編字號乙亥丙子兩科未獲取中一名請自下科爲始一科另編字號取中一名一科歸於大號合試取中俾其觀感奮興力圖上進下部議奏○辛卯譚鍾麟奏蒲城縣被旱請緩徵上忙錢糧允之○諭此次軍政卓異應行預備召見之護軍參領祥曹著於初十日預備護軍參領明魁著於十一日預備回國營總聯恩著改於十二日預備○允丁寶楨奏請旌表貞女來沈氏○壬辰 上詣 大高殿祈雨○何璟丁日昌奏竊照刑部咨議擬御史鄧慶麟奏軍務肅清省分拏獲盜匪請照舊例辦理一摺應否規復舊制行令各省體察情形妥議具奏等因抄摺咨會到閩遵卽飭司妥議辦理查閩省山海交錯最易藏奸興泉漳三府民情蠻悍搶擄械鬪助釀巨案延建邵等府每逢茶市驟添數萬人入山採茶於市罷後三五成羣伺隙掠掠大爲閭閻之害而游勇回匪復時有竊發咸豐三年及同治八年間經前督撫臣先後奏奉 諭旨令拏獲訊明後卽就地正法節經遵行在案近年因籌辦臺防各路散勇游民冀圖投効紛至沓來窮無所歸雖保不嘯聚爲匪各屬搶劫之案亦復層見疊出捕治非嚴肅不可除尋常命盜案件照例解勘外其拏獲情重匪犯請仍從嚴就地懲辦俾凶頑知警而良善獲安據署按察使定保核議具詳聲明因

辦理海防致稽議擬等情前來臣等悉心體察比年來各州縣報獲搶劫等犯或委員會審或交該管道
府覆審果係賊證明確始行稟候批飭正法於年終彙案奏報實係慎之又慎人命不至誣枉閩省為海
疆重地肅清已久而伏莽尚多時度旬結盜劫之風未能止息若遽議改歸舊制誠恐各州縣輾轉因循
致蹈姑息舊轍而盜案久稽顯戮既無以示懲儆長途遞解尤復疏失堪虞自應仍遵前奉諭旨拏獲
情重匪犯於訊明後就地正法以昭炯戒而靖地方仍俟盜風稍息再行奏明辦理下刑部知之○何璟
奏福建巡撫一缺在各省中最為清苦歷任巡撫雖淡泊自奉猶不免進貢多金近以東渡臺灣諸多繁
費凡行程所需以至犒賞等項勢難盡取之在官而內地各項人等視涉海為畏途非優給廩餼薪工無
由得其心力以故費用益增賠累益重臣去冬出都晤直隸督臣李鴻章兩江督臣沈葆楨議及閩撫過
轍若不另籌經費日遠月長恐難為繼李鴻章等深以為然及抵閩後與撫臣丁日昌商公事從不及
他此次撫臣回省訪知辦公費用均由賠墊虧累甚重委係實情且撫臣所蒞地方向不令官司稍有供
億渡臺而後尤形竭蹶在撫臣受恩深重何敢計及其私而臣目見耳聞亦何敢殫於上達查閩省瘠
苦異常自司道以至各府縣皆有津貼一款臺灣道府更有加增而撫臣辦公獨未籌及經費誠恐將來
公事棘手合無仰懇天恩俯准於省城撥金項下每月開支經費銀千餘兩為巡撫辦公渡臺經費出

自 高厚鴻慈得 旨嗣後該撫渡臺時准其每月開支經費銀一千五百兩戶部知道○癸巳 上詣

奉先殿 壽皇殿行禮○吳元炳奏據臺灣紳士前戶部主事姚光發等呈稱我 朝稽古右文超越

前代比年以來凡羽翼經傳秉道立德之儒足爲世所矜式者並准從祀 文廟職等伏讀家語七十二

弟子解叔仲會魯人少孔子五十歲與孔璇年相比每孺子之執筆記事於夫子二人迭待左右孟武伯

見孔子而問曰此二孺子幼也於學豈能識於壯哉孔子曰少成若性也習慣若自然也然則兩賢執筆

記事親承嚴教有功於藝修刪定實無淺深輕重之差而有祀有不祀推原其故叔仲會之從祀昉於唐

開元二十七年其時但憑史記爲斷而史記未列孔璇之名後司馬貞所註史記索隱仍引家語原文以

補其闕 國朝檢討朱軾尊孔子弟子考於孔璇事實內亦據家語之言謂惟因二子合傳故不復標璇

名則公論自不可掩夫孔子微言大義炳若日星天下萬世得以循誦習傳繫兩賢之力居多叔仲會久

經從祀惟孔璇未與斯列此歷朝之闕典有待 聖世之表章呈由該縣學詳經松江府確核轉詳由蘇

州布政使恩錫復核具詳請奏前來 謹案家語叔仲會孔璇同侍 聖門執筆記事信而有徵又查家

語敘列杏壇弟子祭祖以下止存姓名他如申續卽申枏薛邦卽鄒國均已備列兩廡如先賢孔璇者日

侍兩丈確有事實且叔仲會早已從祀而孔璇祀典獨遺似應一體配祀宮牆以光俎豆相應據情請

旨俯准將先賢孔璇從祀 孔子廟庭以昭 聖朝禮重先賢之至意下禮部議奏○吳元炳奏擊獲鴉目劉育洪訊明就地正法報聞○吳元炳奏紳士前順天府府尹彭祖賢遵承先人遺志擴置義田贍族懇敕部查核議獎下部議奏○涂宗瀛奏籌辦馬平五都營後議設流山及下吉魚窩土博等處汛防下兵部議奏○甲午諭御史鄧慶麟奏甘茶引地被歸化城私茶侵佔請交督臣派員設局經理並停理藩院茶票一摺著該衙門議奏○乙未兩○丙申諭敘梅啟照孫衣言應寶時文輝李文敏盧定勳鄧廷枏孫觀張瀛文銑崇禮師曾沈秉成涂宗瀛李明墀俱加一級紀錄三次潘蔚林之望張建基劉齊銜蔣凝學史念祖俱加一級○劉長佑奏參守備吳本榮誣良為竊拒毆斃命得 旨吳本榮著先行革職歸案再辦○丁酉諭何璟丁日昌奏運米賑饑懇准免稅等語本年福建復遇水災饑民嗷嗷待哺全賴運米賑濟現在何璟等已經招商販運所有閩省米船經過江蘇浙江關卡著該督撫等飭令各屬一概免稅以廣招徠而資接濟○諭何璟丁日昌奏特參廢弛營伍之守備等語臺灣滬尾營水師守備郭泰平日不能約束兵丁整頓營伍以致該營犯事及老弱充數至八十餘名之多實屬荒怠不職著即革職永不敘用以爲玩視營務者戒○允李鴻章奏請旌表孝婦洪陸氏○戊戌兩○禮親王世鐸等奏恭照三月十四日奉 上諭朕奉 慈禧端裕康頤昭豫莊敬皇太后 慈禧端佑康頤昭豫莊誠皇太

后懿旨惇親王奕諒等奏遵有相度 太廟中殿位次請飭廷臣會議一摺據稱我朝自順治初年創立廟制迄今 列聖廟享中殿龍位已與九間之數相符等語 穆宗毅皇帝 孝哲毅皇后神牌升祔供奉位次鉅典攸關著王大臣大學士六部九卿翰林科道虔詣 太廟敬詳相度後會同惇親王奕諒等妥議具奏欽此又於五月初二日奉 上諭朕奉 慈安端裕康慶昭和莊敬皇太后 慈禧端佑康頤昭豫莊誠皇太后懿旨翰林院侍講張佩綸奏敬獻升祔禮儀以備採擇並昭穆位次及考證異同各摺片著王大臣大學士六部九卿翰林科道歸入惇親王奕諒等前奏請飭廷臣會議摺內一併妥議具奏欽此臣等於初次奉 旨後遵卽仰知應行與議王大臣等恭詣 太廟敬詳相度復經辦理會議闕內諸臣出閣續詣相度後定期於內閣會議據侍郎袁保恆等送到說帖均各援據經典自抒所見然按之廟中規制不無窒礙難行且修造需時恐於 升祔吉期有誤臣等伏思事關大典欲詳考緣章必恪遵 成憲恭查禮部則例內載道光元年大學士軍機大臣曹振鏞等會議內務府奏請修理 奉先殿後殿龍座一摺內稱原奏 奉先殿後殿七楹供奉 太祖至 仁宗七龍今敬擬中楹列龍惟三供奉太祖 太宗 世祖東次楹列龍惟二供奉 聖祖 高宗西次楹列龍惟二供奉 世宗 仁宗其餘四楹擬爲八龍所有內有各龍以及供案寶椅等件均應稍爲改飾等語當卽會同恭詣相度殿中規

制宏敞 神龜左右餘地尙寬若增修龜座間以界牆於昭穆次序仍係循依舊制應請均照所擬辦理等因惟時 宣宗成皇帝特從所請仰見 大聖人通微合漠之精心雖因時爲變通必折中於至當臣初次虔詣 太廟相度時特以 升祔鉅典禮制攸崇未敢遽行援請原欲集思廣益以求盡善盡美之規庶幾援古證今益昭隆重今廷臣會同參酌所遞說帖雖各抒所見非必無可採擇求其酌古準今究未能全無窒礙臣等復加酌度詳慎熟商與其仰會規制徒事更張不如恪守成規可垂久遠恭查 太廟中殿九楹惟 奉先殿七楹 太廟爲 太祖之廟則 中殿中楹曰應仍照舊規不加改飾其東西各四楹擬請敬倣道光元年 奉先殿成案增修改飾餘地尙爲寬展東次楹及又次楹爲昭位供奉太宗文皇帝 孝端文皇后 孝莊文皇后 聖祖仁皇帝 孝誠仁皇后 孝昭仁皇后 孝懿仁皇后 孝恭仁皇后 高宗純皇帝 孝賢純皇后 孝儀純皇后 宣宗成皇帝 孝穆成皇后 孝慎成皇后 孝全成皇后 孝靜成皇后神牌西次楹及又次楹爲穆位供奉 世祖章皇帝 孝惠章皇后 孝康章皇后 世宗憲皇帝 孝敬憲皇后 孝聖憲皇后 仁宗睿皇帝 孝淑睿皇后 孝和睿皇后 文宗顯皇帝 孝德顯皇后神牌將來 穆宗毅皇帝 孝哲毅皇后神牌升祔供奉 宣宗成皇帝之次於昭穆次序及祭祀禮節係仍依舊制而一切增修漆飾均可擇吉舉行不至有誤升祔吉

期其應行事宜俟奉 旨欽定後由各該衙門參考成案隨時奏明辦理至翰林院侍講張佩綸所稱請
建世室各情一節事涉更張廟制亦屬難行應毋庸議再會議前期刑部送到左侍郎袁保恆說帖一件
會議日通政使錫珍少詹事文治司業宗室寶廷鴻臚寺卿徐樹銘等各遞說帖一件均照錄恭呈 御
覽除刑部左侍郎袁保恆送到說帖後告假出京內閣侍讀學士榮溥戶部右侍郎慶陞工部右侍郎宜
振通政使司通政使錫珍參議嵩溥李杜吏科掌印給事中宗室廣誠掌江西道監察御史文葆華四川
道監察御史阿霖掌貴州道監察御史宗室德金現在請假詹事府少詹事文治國子監司業宗室寶廷
鴻臚寺少卿文碩另摺具奏是以均未列銜再此摺係禮部主稿合并聲明_{以下}袁保恆議禮天子七廟
三昭三穆與太祖之廟而七其制太祖居中在北左昭右穆以次而王王者始受命爲太祖百世不遷有
功德則宗之如周之文武世室亦百世不遷三昭三穆親盡則毀而祧於太祖之夾室所謂迭毀之制有
常不遷之廟非一也自東漢始爲同堂異室之制下逮有唐創祀九代然以高祖太宗二代爲世室亦仍
七廟之規迄宋與明皆沿其舊我 朝 祖功 宗德震鐸古今垂統當卜萬年 廟制仍循九室今當
位次已盈欲變通盡善則制必原本乎經典禮必折衷乎 聖謨乃足以爲萬世法伏讀 文宗顯皇帝
聖訓禮經三昭三穆與太祖之廟而七宋儒朱子謂百世不祧之廟如周之文武世室商之成湯三宗不

在數中則天子七廟特禮之常制非合不祧之室而言 聖訓煌煌知廟制有常而百世不祧之室本無定數非如三昭三穆之不能增立也洪維我 列祖 列宗 聖 聖相承功德之隆超軼千古自 太祖至於 穆宗同爲百世不遷之廟允宜崇立世室如周之文武商之三宗不在天子七廟常數之內以昭隆重查朱子周制廟圖謂文武世室在太祖廟旁居三昭三穆之上蓋古者同宮異廟其制則然後世同堂異室皆以近祖爲尊世室近依太祖與昭穆合居一堂歷代相沿久難復古今若別建世室而昭穆仍依 太祖似昭穆近而世室遠於次未順於情不安應請以 太廟中殿 太祖左右爲世室世室左右別建昭穆六代親廟凡升祔先入親廟若親廟盡而百世不祧者然後由親廟升祔世室此禮之常也第由 太祖至 穆宗共十代同爲百世不祧異日親盡自當同居世室斷非現在九楹所能容擬請於舊制九楹東西各展寬兩楹共爲十三楹奉 太祖居中兩旁各六楹爲左右世室豫計至 穆宗升祔世室時仍留餘地以待後來有大功德而百世不祧者方足垂久大之模永享靈長之祚然必奉 世宗以下 列聖神位先居六親廟以待親盡遞升世室未免遷移之煩非所以昭敬慎而妥 神明伏維由 太祖至 穆宗既皆百世不祧與其待崇奉於將來不如因舊位於現在與其虛世室以俟遞推不如虛親廟以俟序入擬請自 太宗至 穆宗均崇奉世室不必定俟親盡於禮於事均較爲直易其中

殿左右隨牆之外大牆之內東西各有餘地十三丈有奇應特建兩廟各三楹以爲三昭三穆嗣後皆按
次序先奉於昭穆廟至六廟親盡時功德如周之文武則升祔世室守成如周之成康則奉遷祧廟以符
千古不移之通議以定萬年有道之常經如此則世室與昭穆既各全其道亦不失其序以視唐之十一
室宋之十二世親廟混同無別於義理尤爲允協大抵事異周制禮從而變惟變而不失其正亦禮之以
義起者也至展寬 中殿增建昭穆廟經費雖屬不資然鉅典所關雖情繁費且目前祇宜先儘 中殿
展拓於 穆宗山陵奉安以前竣工期於升祔無誤其昭穆兩殿再查會典內載 中殿 後殿東西兩
廡各五楹均藏祭器是兩廡無關典禮之輕重如展拓 中殿東西各兩楹恐兩廡地勢逼近則分建於
昭穆廟之東西仍以隨牆合諸 中殿爲都宮亦與古制不相背也 世室之說起於周之文武具於禮
明堂位詳於春秋文公十三年公羊傳曰世室世世不毀也穀梁左氏作太室百者世世與太通洛誥成王
烝祭文武而曰王入太室禋是也周以后稷爲太祖百世不遷以文武之功德爲宗亦百世不遷故宗亦
曰世室兄朱子禘祫議唐宋以還雖不必沿其名未嘗不遵其義考舊唐書長慶四年禮儀使議景皇帝
始爲唐公舉基天命義同周之后稷高祖創業經始化隋爲唐義同周之文王太宗神武應期造有區夏
義同周之武王其下三昭三穆之外是親盡之祖雖有功德禮合祧遷又案續通考宋寶慶間御史張

太祖爲帝者太祖之廟太宗眞宗仁宗神宗高宗各有制書不祧此與商周不毀之廟魯公之世室名異實同是唐宋不祧之廟皆沿文武世室之義彰彰可考我 文宗顯皇帝聖訓云禮經三昭三穆與太祖之廟而七宋儒朱子謂百世不祧之廟如周之文武世室商之成湯三宗不在數中則天子七廟特禮之常制非合不祧之室而言 天語煌煌特引宋儒論世室之說鄭重言之今日之建世室所以符禮經實所以遵 聖訓也古者廟無名考公羊傳周公稱太廟魯公稱世室邾公稱宮特稱之云爾非以爲名也卽周文武之廟或曰梁或曰祧或曰世室見於書者不一重其禮非重其名也三代之制其詳不可得聞然不過於倫序之間尊親之義正名定分深合天理人情之至非必榜示門楣以彰鴻號也至漢顧成德陽始有廟名然因事飾辭於義無取自同堂異室之制起或曰廟或曰室稱謂不同於尊親之分又沿而無別明立九廟始榜世室曰太宗廟然於古亦無所考今日之議但期於 祖功 宗德之尊左昭右穆之親深合禮意而不戾於時宜固不必昭示隆名且恭查會典禮制 太廟殿應各有稱名而敬瞻 殿制並非一一題榜則名不必立此義昭然矣祖功宗德百世不遷三昭三穆親盡則毀天下通義也唐宋相沿不廢斯義考舊唐書顏真卿議元皇帝之祧遷有曰假令傳祚百代豈可上崇百代以爲孝乎請依三昭三穆之義永爲通典是知不建世室則尊尊者不嚴不立昭穆則親親者無序我 宣宗成皇帝禮

學精深特示祧廟之說欲考古酌今定以限制 聖謨昭垂炳如日星今日之議宜恪遵 聖旨詳考禮制請建三昭三穆者正以爲異日議祧地步庶不至隨時增室終無限制我 朝以 高皇帝爲 太祖實爲 太廟之主而推所自出則自 肇祖始惟歲暮祫祭 肇祖正居中之位四孟時享則遣官致祭 猶唐之獻祖宋之禧祖也故 後殿之制亦殊於 中殿若欲建 世室於 後殿之旁則於職未得其安蓋 宗廟之次以 太祖爲主則尊卑有序而不相亂今欲居 世室於 昭穆廟之上而反居 太祖廟之上是以卑壓尊也於禮似有未可錫珍議禮經所載廟制維隆歷代帝王推極孝思其禮至於無可增加要不如三代聖人之制用意深厚而垂禩久遠考古天子七廟三昭三穆與太祖之廟而七是故夏后氏之廟祀禹爲受命之始祖殷人祖契而宗湯當成湯世數未盡時固仍居昭穆之列至親饗當祧以有大功德宜祀爲百世不遷之祖而祖契之廟不可改乃爲成湯特立廟祀爲烈祖那之詩曰衍我烈祖是也厥後祀太甲爲太宗太戊爲中宗武丁爲高宗皆特立廟則是殷人七廟外實有一祖三宗之特廟四也周禮因殷立七廟祀后稷爲始祖至懿王孝王時文武親盡當祧以有大功德宜特立廟祀爲不遷之祖故文王有文世室焉武王有武世室焉世室者不毀之名也洪維我 朝 列祖 列宗 聖祖相承超越前代 太祖高皇帝肇造區夏功德同天此固如夏祀禹殷祀契周祀后稷爲受命始祖不

遷之廟也 太宗文皇帝繼祚大業以來至於 穆宗毅皇帝 二祖 七宗 聖明作述式廟丕基則
有若商之成湯三宗周之文武也今 穆宗毅皇帝 孝哲毅皇后神牌將行 升祔大典而 九廟既
盈宜增舊制竊以爲禮緣義起制以時降雖因時爲變通必萬世而不朽蓋變通原不出經常之外而議
禮不敢存苟簡之思酌古準今似宜遵倣世室之制移奉 太宗以次神牌別爲百世不遷之廟竊擬
後殿之後增修殿宇移奉 聖 興 景 顯四代帝后神牌而改 後殿爲世室世室中今先移請
太宗文皇帝 孝端文皇后 孝莊文皇后神牌安奉中一室其 中殿東第一室移奉 世祖章皇帝
孝惠章皇后 孝康章皇后神牌以次遞遷則 穆宗毅皇帝 孝哲毅皇后神牌 升祔即可供奉
中殿西第四室伏查古制係一帝一廟卽特廟亦殿有四周有二是世室原無定數也後世太廟規制
既與三代不同則世室一仍同堂異室之制以次供奉亦無違禮至四孟時饗 前殿自有一定位次蓋
古時特廟之制原與七廟同饗祀也或謂世室在 太祖廟後似有陵躐之嫌不知 中殿後自有門垣
亦如周廟制之文世室在西武世室在東所謂各全其尊初不以左右爲尊卑者則亦不以前後爲尊卑
也如以 中殿神牌位次未可遷移不必法古世室之制而因別議增修殿宇以爲簡而易行竊恐既與
禮制未盡協而歷年久遠殿宇遞增必多窒礙其議禮不又難於今日哉文治議 宗廟之制典禮宜崇

以今日之事論之則以酌復古制爲宜諸得而詳言之也考東漢明帝以後爲同堂異室之制後世遂相沿襲莫之能改朱子所謂經五六百年無人整理者也而自晉以下其有將祔廟而室已滿者非議增室則議祧遷其議增室者大抵皆因除不遷之主之外未及七世而中間有兄弟同世者故不得不增如晉增至十一室而六世唐增至十一室而九世宋增至十二室而九世元增爲十五間列入室而六世皆以世數未及而廟室已滿故雖增室未爲大失也若夫父子相繼除不遷之外已及七世前代未有議增室者則惟議祧遷夫祧遷之法自周迄明莫不皆然乃或者謂祧法不可輕議是殆未深考也夫有天下者事七世仁之至也天子七廟不能再加者歲之盡也漢章元成曰親盡迭毀親疏之殺示有終也又曰非有后稷始封文武受命之功者皆當親盡而毀成王承二聖之業制禮作樂功德茂盛廟猶不世以行爲說而已唐顏真卿曰議者以祖宗之名難於迭毀不知祖有功宗有德存至公之義非其人不居蓋三代立禮之本也後世既皆稱宗不得獨據兩字而爲不合祧遷之證假令傳祧百代豈可上崇百代以爲孝乎朱子曰祖有功德天下後世自有公論不以別擇爲嫌由此觀之祧遷之法百王不易又何必諱言之乎誠以不識祧遷必須增室若萬萬世後將爲萬萬室乎亦必無之理矣故自漢迄明卒不能出此法之外也惟是我朝聖聖相承祖功宗德遠邁隆古誠有不容輕議者欽惟太祖高皇帝爲我

朝始受命之君自應爲七廟之尊 太宗文皇帝 世祖章皇帝 聖祖仁皇帝又皆爲創業有功之主均應爲百世不遷之廟以七廟之制言之則 世宗憲皇帝以下尙在大親廟之內今 穆宗毅皇帝升祔有時而 太廟中九間已滿增室既非久法祧遷又無可議故曰以今日之事言之則惟酌復古制爲宜也夫古制宜復歷代禮臣大抵皆能言之而惟朱子之言爲最盡大意謂東漢以後爲同堂異室之制更歷魏晉下及隋唐其間非無奉先思孝之君據經守禮之臣而皆不能有所裁正其弊至使太祖之位下同孫子既無以見其爲七廟之尊羣廟之神則又上歷祖考而不得爲一廟之主以人情而論之則生居九重窮極壯麗而沒祭一室不過尋丈之間甚或無地以容鼎俎則孝子順孫之心於此宜亦有所未愜矣且如命士以上父子婦姑猶且異處通尊卑之序不相遺襲況以天子之尊可以無所不致顧乃特於漢明非禮之禮而不得以伸其備物之孝豈事亡如事存之義歟若其制度則取劉歆七廟之議既爲之說又爲之圖詳備明盡廢如指掌大概謂外爲都宮內各有寢廟別有門垣太祖在北左爲三昭右爲三穆以次向南太祖百世不遷以下六廟親盡遞毀而祖功宗德之廟建於三昭三穆之上不在七廟數中苟有功德則宗之不可預爲數數亦百世不遷可謂考訂精詳斟酌盡善矣自是而後惟明世宗作九廟頗合古制雖不久旋廢然三代以下實爲千古鉅典揆今 太廟地勢較前明似應宏闊若能斟酌

行之誠爲合於古宜於今萬世不易之定制行之久遠而無窒礙者也謹案今 前殿之制重檐四阿卽古所謂廟象生之有朝也 中殿之制後爲寢室卽古所謂寢象生之有寢也今擬略倣古制則 前殿中殿俱可仍舊不動卽爲 太祖之廟建大親廟於 前殿兩旁及兩廡之地及短垣之外東西地勢尙非不足惟各廟之內俱應前爲正殿五間後爲寢殿三間進深俱不能太淺兼南有甬子河之阻則南北或至迫隘但東西第一兩廟可與 前殿後檐相齊東西第三兩廟卽稍出於戟門之南則戟門亦可迤南量展若地勢仍不能容則倣明制每廟止建正殿五間以其後半爲藏主之所不用寢殿則 正殿更可宏壯矣其祖功宗德之廟卽建於 中殿兩旁東爲二廟西爲一廟體制應較六朝稍加宏闊惟東之二廟應東西并列則東邊大牆亦須外展方可其兩廡卽應移建大廟之外此制若定則今之 前殿中殿專以供奉 太祖高皇帝爲七廟之尊其祖功宗德之廟卽擬古之世室東第一廟爲 太宗文皇帝世廟西第一廟爲 世祖章皇帝世廟東第二廟爲 聖祖仁皇帝世廟俱百世不遷其六親廟西第一廟供奉 世宗憲皇帝東第一廟供奉 高宗純皇帝西第二廟供奉 仁宗睿皇帝東第二廟供奉 宣宗成皇帝西第三廟供奉 文宗顯皇帝東第三廟供奉 穆宗毅皇帝如此則昭穆有常秩然不紊其祭不節於以洗于祀仍遵現行禮古之陋成一代之法伸孝思於罔極垂休光於無窮甚盛舉也明

邱榕曰同堂異室行之千百餘年一旦復古蓋亦難矣必欲適今之宜而不失古人之意宜用都宮之制七廟各爲一室太祖之廟居中分爲三昭三穆有功德者別出之以爲世室其意蓋亦如此也夫事苟合於古而不宜於今則不免迂闊雖行若宗廟之制同堂異室論依違牽制不免失禮終不無窒礙不可行之時何若都宮別廟之法於禮既合於情亦順且無不可行之處是豈如封建井田之比哉但以後世人情樂因循而憚改作因陋就簡而不行耳非有他故也而雖之者約有數說如馬端臨二說一謂太祖之議難決則本朝太祖之位可無異議一謂兄終弟及昭穆必亂則後儒已有駁之者而爲同廟異室之說蓋亦不易之法也又如禮節煩難之說則今固合祭於前殿也又如勞費當惜之說明廖道南云按禮曰君子將營宮室宗廟爲先居室爲後孟子亦云君子不以天下儉其親況後世尺地寸土皆祖宗創業垂統之所貽百官萬民皆祖宗休養生息之所致以祖宗之土地建祖宗之廟以祖宗之臣民供祖宗之事如之何其不可行也亦可謂至論矣若不出此而能合於禮意順乎人情百世可行衆心咸懷則可矣若徒爲一時之計而不爲久遠之法則非一勞永逸之意也宗廟事重何敢妄言惟既遵旨會議若乃徇異譁言則反爲不敬故敢據愚見略述前代之迹昔人之言非敢必謂今日可行也徐樹銘議古者天子七廟每廟之中廟在前而庭在後廟爲祭饗之所如今之前殿是也寢爲藏衣冠之室如今之

中殿 後殿是也古者特祭各於其廟而時飡大飡皆於太祖之廟如今四孟時享歲終飡祭皆於

前殿也今奉議 穆宗毅皇帝 孝哲毅皇后升祔位次謹卽相度會議仰瞻 前殿規模廣大祭享之

廟廓乎有容所當議者恭藏 穆宗毅皇帝 孝哲毅皇后神牌衣冠之寢室耳伏念唐虞二代宗廟之

隆規莫良於分建昭穆之廟昭廟建於左穆廟建於右昭穆有序則萬世可以通行今諸於 中殿之左

崇建 寢殿祇奉 神主正南向之位蓋修寢而不修廟祭享之時仍於 前殿同在一廟之中與歷代

所謂別出謂廟者不同又 中殿九室各隔以屏牆增寢於 中殿左右附近連屬與隔屏牆無異附之

爲附也附之爲附也附廟也附於 中殿而不謂之附可乎又況祭享同廟謂之非附於廟可乎古

者新主入廟則祧其七世之祖有功德者別建世室夏之世至少康而已殷特建之廟成湯三宗而已周

之世室文武而已今 列祖 列宗功德隆盛邁越千古歷奉 諭旨百世不祧若議建世室於 後殿

之旁則嫌於居 太祖之上惟增建寢室昭穆既得其序 神靈所蟄感通降福錫祥垂萬世無疆之祚

矣輒廷議事必師古禮貴因時泥古而不宜時可言而不可行趨時而大背於古雖當時可行而不可傳

後世謹案古制天子七同宮異廟後改同堂異室原非古制今再欲復古固迂闊難行然大體攸關準今

總當酌古如遵古禮親盡則祧則維 聖祖 世宗親盡 二聖既斷不可祧而不祧則 穆宗不能成

升祔禮今欲籌一不祧廟 二聖而能 升祔 穆宗之法則惟倣周立世室庶乎可也夫孝子慈孫豈不欲世世不祧而古禮止於七廟者親親有殺也且始祖之尊非諸廟所可比故獨自世不祧若諸廟皆不祧尊其宗反卑其祖周多賢君雖成康之賢未嘗不祧文武雖不祧而改稱世室不稱世廟誠以七廟古今定制不可增減孔子所謂自虞至周之所不變者也我 太祖開基萬世自當萬世不祧 太宗世祖比隆文武 列聖功德高大亦遠邁前朝擬倣周文武世室之制立 昭穆二世室於 中殿兩旁牆外空院地窄不能多容擬建方殿縱橫各五楹奉移 太宗神牌於 昭世室北面中一楹奉移世祖神牌於 穆世室北面中一楹移 聖祖神牌於 昭世室東面北第一楹同爲不祧之祀 中殿中楹仍供奉 太祖神牌萬世不祧昭穆各四楹 太宗 世祖 聖祖神牌既奉移 昭穆世室擬恭奉 列聖神牌依昭穆之序上移即恭奉 穆宗神牌 升祔於昭第三楹自今以後當遵古七廟之禮依序 升祔親盡則祧設親已盡而功德昭著必不可祧即依序奉移 世室配享 太宗 世祖同爲不祧之祀但不可世世皆入 世室蓋 世室者所以崇德報功非尋常之廟祀若查是入祀轉非尊崇太宗 世祖之本意祭禮古聖所定宗廟國家大典臣民瞻仰萬世流傳非惟臣下不敢曲意頌揚以爲迎合君上亦不敢輕易增損也如此則 二聖不必祧而 穆宗可成 升祔之禮兩無所礙且師古

定禮既宜於今復不大背於古似近可行或謂秦移世室非祧而終嫌近祧非尊崇之道夫祧不祧之分不在地而在祭世室祭之疏數與中殿同何嫌之有且周朝尙文武別立世室將謂周不尊文武乎以祭文武之禮祭列聖猶謂不尊崇乎或謂世宗在中殿兩旁不足以昭隆重不知文武世室亦在祖廟之側中殿以太祖爲主三昭三穆不過暫祀原非一定之廟以太宗世祖配太祖非配列聖也何嫌之有且改廟稱室地殊制異各表尊崇何必拘牽同論哉又或謂三聖與太廟同堂供奉已二百年一旦欲另地供奉似未妥協不知同堂與室本非古制既同宮何必定同堂哉或又謂中殿九楹何必定改七廟不知周之九廟兼世室而言既另立世室再設九廟是十一廟矣有此禮乎舍此而他籌良法別立廟以祀穆宗雖一時權宜可行日後再遇當祧又將何如聖祖不可祧列聖可遠議祧乎若自此世世皆不祧廟盡卽增不惟非禮國家億萬年恐無地容之若以中殿九楹皆爲不祧之祀而別增七廟雖似可行然事不師古難垂後世且穆宗削平大亂功德上繼列聖亦難議祧日後親盡時又如今日事矣若再建九廟雖於事無礙更非古禮矣若中殿兩旁接增數楹似尙可行然必須多增日後乃可依序而祧否則仍多滯礙終不如世室之近古也總之聖人百世之師三代之禮雖難盡遵要不可大背三代下之禮非因陋就簡卽踵事增華

皆不足法緣情制禮不順乎情則虛而無實不節以禮則和而不可行必其無礙於今而不大背於古乃

爲經極悉協

以下醇親王奕譞奏 臣奕譞奉派同王大臣等敬詣

太廟中殿相度

穆宗毅皇帝

孝

哲毅皇后升神龜座位次當因龜位已與九間之數相符恭請

懿旨飭下廷臣

集議嗣蒙

皇太后命

臣與議遵於五月十一日至內閣與王大臣等悉心會商並詳閱飭交入議之侍讀張佩綸奏摺附片及

侍郎袁保恆等所擬圖說各件伏查此次會議原因

廟室已盈欲從萬難設法之中求一至當不易之

論鉅典攸關曷敢輕違臆說惟既蒙

清問下逮請以因陋之見敬爲

皇太后陳之伏思一代有一代

典則我

朝列聖升祔之制既與古時七廟九廟不同則自太祖高皇帝至

穆宗毅皇帝巍然十

室億萬斯年斷無別建世室暨議祧之理惟限於中殿間數不能不酌改舊制以示尊嚴又不應暫顧目

前致留日後變更之隙諸臣之條奏說帖雖立論不同而援古據典則一據臣愚見總以同堂異室爲一

定不移之制臣等於正月間遵 旨相度時禮部尚書黃書蔡卽有擬遵照

奉先殿增修龜座之議令

王大臣公議

中殿中楹仍照舊規不加改飾於變通之中寓尊崇之意今日

穆宗毅皇帝昭位既定

卽異日親增亦敷供奉似較諸說爲妥第

廟楹規制有限

國朝統緒無窮如此增修尙非至計伏思

祧廟之禮本係歷朝經制無可避忌臣愚以爲欲垂久遠之圖須籌變通之舉恭惟 文宗顯皇帝御極

之初 特旨將來停舉 郊配是以後人奉爲 成憲 皇帝以宗支入承大統自不敢上擬 列聖果
能以身爲率垂式儀型論理論情均各允當可否恭請 皇太后諭令 皇帝明降諭旨曉示天下自今
以往不得援自世不祧之例惟當一循古禮親盡則祧庶 盛朝鉅典與天地常存 皇帝誠敬之心亦
與禮經並著矣又奏祧主藏於夾室歲暮奉以合享衾褥之屬收庫此古制也我 朝 太廟向無夾室
名目今臣既有所奏誠恐後人或以祧主無地尊藏致生異議竊思以向南論之 後殿東西二梢間似
與夾室相近東西兩廡亦似與庫無殊若藏主於室藏器於廡正與古制相合且過慮所及合併陳明用
備 采擇文治奏事有猝言之似不可行細思之實無不可行者要在平心易氣詳加揆度而後知其理
之所在耳如 穆宗毅皇帝升祔一事奴才於遵 旨會議時嘗爲酌復古制之說今經王大臣等會奏
摺內已照錄恭呈 御覽伏思事關大典不厭往復求詳如謂古法不可行之說大概雖有數端要皆不
出古人詰難之外奴才愚陋之見何敢堅執初議顧議者徒云古法之難行而曾別無盡善盡美之策甚
至其所以爲說者反之於心且不能自以爲是焉況事倘非久遠可行則異時必更張未已即王大臣等
定議並龜之制既有簡略之疑又非久遠之法誠如原奏所稱若敬倣 奉先殿並龜成案似於 太廟
體制不足以昭隆重者也如謂欲復古制工程浩費一時艱於營建則諸 臣所請只可暫作爲權宜之計

勿卽定爲不易之規仍酌籌款項隨時興修似亦慎重 宗廟之意也徐樹銘奏古者天子皆立七廟然三代則循各廟之規漢唐則定同堂之制各廟則承垂久遠同堂則時有變更未有準古則仍用同堂酌古能兼採各廟者也 國朝因明之得尊奉 列聖 功德隆盛 九室巍然自應永定爲不祧之廟現在恭奉 穆宗毅皇帝 孝哲毅皇后升祀典禮諸臣請遵昭道光元年 奉先殿改飾成案緣情定禮因時制宜在目前辦理法美意實誠爲盡善之策惟億兆祝無疆之祚而器遠愧一得之愚此次集議諸臣各說帖多已窒礙難行將來億萬年加祚已滿之後延臣集議必且更難於今日周人制禮先公之祧主藏於太廟之夾室後王之祧主藏於世室之夾室其百世不祧之主尊奉於昭穆以上之世室若昭穆之廟未立則祧廟世室議建之地非居太祖之上卽居昭穆之下依違牽制斷難悉協機宜伏讀道光三十年 硃諭按禮天子七廟周禮小宗伯辦禮祧之昭穆而因特垂按禮議行之 聖訓 宣宗成皇帝洞燭漢唐增室之非特定昭穆主廟之禮 寶訓煌煌思深慮遠誠萬世通行之至計也此次若非惠陵大工將近告竣恐誤 升祔之期深誠遠慮之臣莫不曉然於 祖訓之宜遵昭穆廟之宜復今既祇循 奉先殿成案近遵家法於昭穆倫敘各得其宜所有 前曾會議崇建疑殿於 中殿之旁一節自非此時要務惟將來億萬年後尊位難議更加羣言尤虞龐雜更恐世代既遠議禮之臣未有默喻

此次援引 奉先殿成案之苦心輒以祧禮爲說或請遞遷 列祖或請並祧 列宗古義雖欲強援人

心必多未協蓋 廟中之規制有定加龍之位次已增豈可再議變更轉多窒礙應請並遵按禮議行之

祖訓豫定昭穆建廟之隆規如侍郎袁保恆圖說建昭穆廟於 中殿左右準今酌古廟各五室或九

室隨牆之外都牆之內展拓興建地勢有餘規制亦合既可永遠通行十世之後更建昭世室穆世室各

五楹於昭穆廟之北以奉不祧之主卽於世室兩旁建夾室各二楹以藏昭穆廟之祧主如 前殿合享

時 神案已盈仍建昭前殿穆前殿於昭穆廟之南以備分享之用庶無裁損籩豆寧帷殿外之譏而

太祖高皇帝至 穆宗毅皇帝尊奉於 中殿永爲萬世不祧之廟後之臣工庶不至輒稱祧禮遞遷

列聖卽此次恭援 奉先殿成案辦理之處亦可永保障規無虞再有更動實四海萬世臣民所幸願

爲廷議允諧更求永遠通行以綏 列聖神靈而慰臣庶禱祝之忱起見可否將 此摺 飭交禮部存

案抑或 明降諭旨之處 愚未敢冒昧瀆請恭候 聖明定奪鍾佩賢奏本日會奏 穆宗毅皇帝

孝哲毅皇后升祔位次摺內一切規制業經敬謹臚陳恭候 欽定惟制既協乎時宜事必規諸久遠歷

代廟制太祖而後有功德者則不祧實爲古今通義我 朝 聖 聖相承功德巍煥以故 三祖 七

宗俱爲百世不祧實古鑠今望乎莫尙已顧尊親之意無窮而禮制之行有限功德之在將來方興未艾

廟室之有定位非可屢增此非臣子所忍言必待 聖人之定論伏查 郊壇配位道光三十年二月初六日欽奉 諭旨以 三祖 五宗爲定永遠遵行以 文宗顯皇帝如天之德升奉 郊配誰曰不宜然而 聖懷冲挹慮後世或有竊礙是以 聖懷仰見 大聖人識量恢宏迥非尋常所能擬議臣敬念 廟祀不祧與 郊祀配饗均關鉅典事異理同今 穆宗毅皇帝升祔 太廟 三祖 五宗百世不祧固炳然爲不刊之典以後於萬斯年不祧之禮是否永行無室恭候 皇上春秋鼎盛 聖心自有權衡若蒙 特降綸音使他日聖子神孫欽承恪守則 廟制得 聖旨而永定與當日 文宗顯皇帝欽定 郊壇配位異世同符矣文碩奏光緒三年三月十四日奉 上諭朕奉 慈安端裕康慶昭和莊敬皇太后 慈禧端佑康頤昭豫莊誠皇太后懿旨悼親王奕訢等奏遵行相度 太廟中殿位次請飭廷臣會議一摺據稱我朝順治初年創立 廟制迄今 列聖廟享 中殿龍位與九間之數已符穆宗毅皇帝孝哲毅皇后神牌升祔供奉位次鉅典攸關著王大臣大學士六部九卿翰林科道妥議具奏欽此五月初二日奉 旨交下翰林院侍講張佩綸條奏摺片三件一併覽議仰見我 朝慎重祀典不厭周諮之至意臣等欽遵虔詣 太廟敬謹相度後於五月十一日六月初五日迭赴內閣公商各抒所見往復斟酌期於詳慎臣等恭讀 宣宗成皇帝硃筆遺訓第二條迴環敬繹竊謂盡善盡美之策殊不

易籌惟特建寢殿一說較爲可用敬擬於 太廟中殿進東特爲 穆宗毅皇帝建南嚮 寢殿九楹或
七楹中奉 穆宗神牌兩旁各楹或可留備他年夾室之用在現時則稱 東殿迨將來即可尊爲 昭
世室其隨牆 配殿等項隨地度勢推展增添因時制宜次第料理以肅觀瞻敬謹推本 宣宗貽謀垂
裕之 法書所以仰體 穆宗孝思法 祖之 聖德也與廷議敬倣 奉先殿體制併 龜供奉之請
不符諸臣既稱工作需時恐誤 升祔吉期行禮同闢祀典各稟 憲章固不敢堅執臣所擬之必當然
襄議 國家禮制參酌不厭周詳查會議事件向有兩議併陳恭候 欽定之例臣謹遵循專摺擬奏姑
備 聖明兼聽之一格又奏奴才遵議 穆宗毅皇帝 孝哲毅皇后神牌升祔 太廟供奉位次敬擬
特建 毅廟寢室於 中殿之中在現時則稱 東殿迨將來即可尊爲 昭世室與廷議不符業經另
摺奏請 聖裁矣夫恭議 升祔大禮 廟制祀典攸關既已衆論僉同奴才何敢復執記問耳食之知
固爲可否異同之辯惟伏讀 宣宗成皇帝硃筆遺諭敬繹 廟祀一條仰窺精微所在蓋以天子七廟
古禮由然漢唐以後廟制紛更足非當否不一而足無可取也我 大清 太廟中殿九楹供奉 太祖
高皇帝以至 仁宗睿皇帝巍然七室規模大成雖兩旁各餘一室而 景運無窮當爲億萬年長久計
若不明示法制惟恐貽笑後人 大聖人固早慮及九室既盈之後再遇 升祔之禮維時 君臣迫於

情勢難安不得不於 太廟成規稍加更定而 列祖 列宗 功德隆盛實邁前古在 聖心奉先
無替之誠萬萬無容祧遷之理至殿室併龜諸舉又不足以昭 聖朝 廟制尊嚴二者皆所不取故欲
以 身作則昭示來許特發議祀之端用式遵循之軌是今日之事既在 聖明先鑒之中則今日之禮
亦惟遵 遺訓推本議行此奴才敢請特建 毅廟寢殿之愚忱也前於公同擬議時曾經備言其理
且謂長策雖費周章然而未可輕廢儀文末節不妨稍事從權大體章程總宜委曲成就誠以如是然後
九廟成規之降始臻無替億齡經久之策亦易持籌無負 宣宗貽謀之遠略正所以仰體 先帝法
祖之孝思也今按廷議公進併 龜一議亦本道光元年 奉先殿舉行成案爲言固非臆創之論第
太廟與 原廟情形不同體制僭宜嚴肅敬釋 遺訓於各 原廟則謂庶可遵循舊制於 太廟則
誠勿升祔如何祀享按禮議行議可見矣安知非正因有道光元年成案惟恐日後或致推行於 太廟
聖心不以爲然因豫爲 垂誡乎雖 殊論引而未申然精微不容不釋查三月十四日聖親王奕琮
等恭請 懿旨原奏內於此節固已知不可行之 太廟矣是亦諸臣所當共知者也知之而猶必極爲
之請者意或以爲非符 列聖升祔 中殿稱儀不足以伸臣下尊敬之忱乎夫尊敬之忱固人臣所同
具方諸臣定議之初奴才亦未始不欲隨同班諸退而深省覺有精粗之辨焉未可泥其一而不通其二

也竊謂 廟祔與 郊配同爲尊崇大典洪惟 列聖豐功駿烈厚澤深仁同爲百世不祧之 廟卽應

同舉 升配 天 地之禮敬稽兩郊配位始自 太祖高皇帝終於 宣宗成皇帝至 文宗顯皇帝

升遐後應行此禮恪遵道光三十年二月初七日欽奉 諭旨不復舉行其時廷 臣亦未敢有固請者豈

文宗功德不足以當之乎抑廷 臣慢於尊敬之禮乎蓋 郊壇定制 青輦祇容八座有乾隆十四年

成憲昭昭不敢輕易故永停 郊配之禮不得不自 文宗始也而 聖懷沖抱 功德益煥謙光

太廟成規 中殿祇此九楹有道光三十年 遺訓煌煌永宜遵守則特建奉 寢之殿自亦不得不自

穆宗始也而 世室昭垂 宗統無妨隆重先後蓋同揆焉皆所謂行乎不得不行止乎不得不止者

時也斯時也抑卽 宣宗明示有其時之時之謂歟時之爲義大矣哉烏可得而忽之也蓋 景祚延長

雲祚衍慶續營 廟寢終在必行與其有待於將來莫若乘此 九室既盈之際卽爲 穆宗毅皇帝首

建 特室崇基乃協因時制宜之義斯成名正言順之舉倘此時稍涉推延遷就時會一失 成規已紊

始謀弗慎挽救極難相沿日久不轉出漢唐廟制之下得無慮咎人容主之譏何以仰副 宣宗懿定祀

典之苦心 垂裕貽謀之至意奴才伏思人臣事君之敬莫大於將順其美猶之人子事親之孝莫大於

先意承志事君事親理原一貫欽惟 穆宗毅皇帝性情達孝 大德彌綸十三年奉侍 兩宮皇太后

備崇 尊養之文極盡 歡娛之意此天下臣民所共聞共見者也卽此仰窺 在天之靈必以 皇祖
之心爲 心降 遺命之制爲 制祇以 春秋鼎盛未及 明示萬年後之法程嗚呼此 先帝法
祖未竟之懷也然則今茲議禮必有以默契 善繼善述之精微斯他時安佑仍克昭來享來格之降
鑒勸 聖德至大精鑒至深有斷非臣下管窺淺識所能仰副萬一者此孔子所謂非天子不議禮不制
度不考文也是則奴才愚忱與廷 臣集議皆不必其盡善盡美固不妨於兩議併陳恭候 皇太后 皇
上聖鑒欽定至修造需時恐誤典禮一節竊謂 山陵泰安不可從緩此實萬不可從緩者也至於既虞
升祔禮有定期儀文所關亦屬緊要但一顧慮及此則於上隆 九成廟規下垂萬世經制之計又復
相礙勢處兩難宜決避就同關祀典斷非臣下所敢置詞應俟諸 臣暨奴才所進各議既蒙 聖裁采用
後大端以定其餘事宜如有必應從權辦理之處由各該衙門查照成案設法酌擬隨時具奏請 旨遵
行總之此舉關係我 大清一代禮制者甚重今日一奉 綸音卽垂爲天下萬世瞻仰典則今昔時勢
不同固不必好名泥古然亦不可不慮後世或謂今日更定 廟制之略殆有甚於漢時變古之初此又
奴才杞憂莫解之愚忱也奴才敢知 明禮大典一經 聖智之權衡則本末輕重必能允協於至當而
有以上格 天心下孚與頌固無待奴才瑣瑣瀆陳者惟自念滿洲舊僕世受 國恩雖賦性庸愚不足

以仰贊 高深然管蘇有見亦不敢不冒昧奏 聞寶廷奏宗廟大禮不可泥古亦不可背古一朝制作
萬世瞻仰因革損益弗可弗慎奴才前奉 旨會議 太廟升祔位次曾遞說帖擬倣周制增立世室會
議王大臣等以為窒礙難行欲敬倣 奉先殿并龜供奉奴才學識卑淺不諳時務既已眾論攸同豈可
固執己見然鉅典攸關不敢立異亦不敢苟同謹就管見所及敬陳之夫禮因時而制宜亦因地而制宜
太廟尊嚴與 天壇等非 奉先殿可比 奉先殿之制無妨隨時變更 太廟為對越之地不可輕
變古制古之廟制同宮異室自漢改為同堂異室相沿至今古制遂失論者非之今雖不能復古豈可再
變萬世之下將謂同堂異室自漢始同室異龜自我 朝始何以示後世我 朝 祖德 宗功超越前
代上追三代 宗廟大禮乃簡略若此致令後世與漢同譏豈不可惜不第此也天子七廟自虞至周之
所不變親盡則祧古之定制今所議但 祔不 祧一時雖權宜成禮 國家億萬斯年日後仍恐室礙
列祖 列宗 固不可祧而斷無世世不祧之禮是非臣下所敢妄言 宸衷應早慮及也奴才非不
知禮與其奢不如從儉時事艱難當求簡易然事可變通禮雖更改奴才所議固不可行并 龜供表未
免大變古制可否請 旨飭下廷 臣博考古今重議以 開務求不背於古不礙於今可垂於後乃為盡
善冒昧妄言罔識忌諱自知有罪因 廟祀鉅典關於 國體甚大既在議禮之列若緘默自安知而不

言獲罪更深用敢不顧咎戾越分直陳伏乞 皇太后 皇上宥其狂妄之罪而察其愚誠幸甚幸甚又
奏初次相度後奏摺內原有若敬敬 奉先殿并龍成案似於 太廟體制不足以昭隆重之語是王大
臣等亦知此語之非惟因諸上所遞說帖均有窒礙且恐誤 升祔吉期不得已始生此議既省工復速
成固爲簡易然鉅典攸關非乃太簡謂增建世室爲更張豈改飾 神龜獨非更張如恐有誤吉期恭查
乾隆元年繕修 太廟曾在 前殿安奉 列聖神牌今何妨暫假 前殿或 後殿成 升祔禮俟修
造告竣再奉移 中殿或謂 前殿 後殿非 升祔之所於禮不合不知暫假本屬從權並非定位何
不可之有且暫假之違禮僅數年改飾之違禮無窮期孰大孰小應有辨之者如恐工程浩大一時難辦
既已暫假 升祔修造無妨從緩 國家用款繁多不論何項皆可撙節以備修造之費蓋 宗廟爲至
重之地 陵寢尙居其次他更無論矣簡略 廟制貽變百之幾何如撙節他項以崇 廟制而符古禮
奴才非敢傳會古制妄思更張不守 成規特不欲萬世下 朝廷有因陋就簡再變古制之名是用不
顧冒瀆言而又言欽奉 慈安端裕康慶昭利莊敬皇太后 慈禧端佑康頤昭豫莊誠皇太后懿旨本
日據禮親王世鐸等奏穆宗毅皇帝孝哲毅皇后神牌升祔供奉位次遵旨敬謹相度會議具奏醇親王
奕譞奏請定永遠至計詹事府少詹事文治鴻臚寺卿徐樹銘內閣侍讀學士鍾佩賢鴻臚寺少卿文碩

前據西甯辦事大臣咨稱據前藏貢使沙克加降巴等稟稱路經洮州該土司詳報諸們罕轉世降生本地懇請迎接回藏等因當經譚行商上令其查明稟覆茲據稟稱委係獲罪之曾掌辦西藏事務額爾德尼諾們罕噶勒丹錫勒圖薩瑪第巴克什阿旺楚勒齊木轉世之呼畢勒罕阿旺甲木巴勒楚稱甲錯即懇大皇帝格外恩施准其接回前藏專習經典不敢干預公事仍乞 聖恩原授名號則合藏僧俗羣感 鴻恩無既矣奴才伏查所稟係屬實情可否之處出自逾格 天恩下該衙門議奏○庚子李元華奏特參假充軍營採辦軍火嚇詐鄉民財物並一再行竊得贓之都司高友楨奉 旨高友楨著卽行革職嚴訊按律懲辦○辛丑 上詣 大高殿報謝○左宗棠劉典奏請添設硝河城千總弁缺並鹽茶營都司與西安州汛千總互相移駐以重地方而資保衛下兵部議奏○壬寅諭沈葆楨吳元炳奏遵查已革知縣臚呈各款均無確據案詳核定擬一摺此案已革江蘇銅山縣知縣許誦宣因李劉氏命案並不詳驗經屍屬告發後聞將參劾疑爲道員吳世熊與知縣蔣志拔合力傾陷臚列各款向該督衙門呈遞現經吳元炳確切查明據稱所呈古文二篇係屬私家刊刻不足爲據鈔錄致蔣志拔三函則據蔣志拔呈明並無其事兩內所稱吳世熊輕縱土匪各節悉屬虛誣該革員因病未能到案現經確查定擬請旨辦理等語許誦宣因玩視命案被參輒敢據拾他端封遞文函意圖挾制實屬居心狡詐許誦宣業經

革職著從重發往軍臺効力贖罪吳元炳另片奏查明該革員所稱沈葆楨家丁在徐州挾妓飲酒一節實係誤聽傳聞其爲虛捏無疑等語卽著毋庸置議○癸卯李元華奏東省本年挑挖北路運河現已工竣委員驗收均係一律寬深如式動用經費銀兩因以工代賑較上年至爲節省各該承辦委員等可否擇尤保獎以示鼓勵得 旨著准其擇尤保獎毋許冒濫○甲辰金順奏請予陣亡知縣駱國賓交部優卹陣亡副都統興祿等在營病故補用知縣華勇俱交部議卹允之○王文韶奏湘鄉縣職員朱暉及其弟朱增暉開設錢店無端關歇倒騙存款除將文生朱增暉咨部註革外請 旨將朱暉花翎道銜一併斥革以便嚴審懲辦得 旨如所請行○乙巳允金順奏請予在營病故已革游擊尹吉寶開復議卹○允徐宗瀛奏請獎越南軍務及歷辦土匪出力人員陳正珀等已開魯名號○以廣西委辦善後局補用知府楊彤壽積勞病故交部議卹○丙午諭御史沈鈹奏各省災歉疊見請飭內外臣工勤求治理一摺本年江蘇安徽蝗蝻爲患疊經諭令沈葆楨等督飭搜捕福建廣東均被水災山西亢旱尤甚亦經諭令該督撫妥籌撫卹茲據該御史奏稱湖南廣西亦遭水患陝甘亦復苦旱東豫畿輔並有飛蝗蘇浙地方猝遇大風有倒塌房屋損壞船隻之事覽奏實深座系朝廷軫念民依每遇四方水旱偏災宵旰焦勞時深修省際此災祲疊見內外臣工自應共矢公忠力圖補救各直省督撫身膺輶寄於吏治民生尤應力

戒因循認真整頓閭閻疾苦務當曲爲體卹屬吏欺朦必須隨時懲辦庶幾上理日臻自足以迓和甘而消沴戾其現在被災各省輕重情形若何並如何籌辦之處著該督撫據實具奏以慰廑念○丁未諭都察院奏湖北民人胡佐懷以朦例壞法等詞赴該衙門呈訴據稱民人之父胡士禮前被所收綸營毆斃一案詹啟綸業經奉旨絞候旋有營官吳東山主使所煥章來京商通提塘田明經等爲所欺綸營脫罪名適有御史鄧慶麟具奏軍營官弁獲罪例許聲敘詹煥章吳希之即在刑部及黃安縣本籍捏呈所欺綸家陣亡有人並由田明經等持御史鄧慶麟奏稿到所家索銀之事等語案關人命重情朋謀脫罪牽涉言官虛實亟應澈底根究著交刑部嚴行訊究務得確情所有在逃之吳希之詹煥章著步軍統領衙門順天府五城直隸總督一體嚴拏務獲歸案審訊御史鄧慶麟著聽候傳質○諭前據成綱等奏滿州舊有陵寢營田請飭交出當諭令李鴻章等查勘具奏茲據奏稱該州營田本係民地先由總督派員經理嗣於道光十一年奉旨歸該州自行經管所收之米按額運解易州以備西陵官員俸精之用等語此項地畝既據查明向歸地方官經管卽著仍照舊章辦理並著督飭該州認真整頓倘有藉詞延宕虧挪情事卽行據實奏參○諭劉坤一奏捐建忠義祠請飭春秋致祭一摺兩廣總督劉坤一捐資爲舊部陣亡病故楚勇在原籍新甯縣建立忠義祠著俟工竣後由地方官春秋致祭以慰忠魂○辛亥

國○壬子 上詣 大高殿 靜皇殿行禮○癸丑 上詣 太廟行禮

東華續錄

光緒十七

臣朱壽朋敬編

臣沈彭年恭校

秋七月乙卯左宗棠奏達坂大捷安集延兵頭大通哈胖色提等概行就縛自請公同上書會長怕夏擒
陝西逆回白彥虎解赴軍前獻還南八城再懇 恩宥劉錦棠許之令其各選親信數人同所遣八城纏
回前去後遂未得其回報茲據劉錦棠稟五月十四日有哈密回王邁哈默特從前疊次所遣探迎其
母之回日和加木牙斯實色德可有阿布都實實提總攷實實提又蘇卜爾蓋秋如可等六名帶同逃
出雖回到托克遜搜營並持回哈密大臣路崇景驗訴稱我們前後奉親王三次派赴南路訪尋老福管
一入吐魯番境均被安集延卡兵盤獲送托克遜見怕夏怕夏即將我們監押嗣隨怕夏到庫爾勒地方
仍照前監押上年聽得官軍破百牧地得了紅廟子安集延人南八城人都害怕今年官軍破達坂城安
集延人盡死其頭目又被生擒纏回九百餘人蒙恩釋放怕夏殺過數十人監押一半餘俱潛逃回家各
城纏回畏官軍之威感官軍之德愈恨怕夏不服其約束怕夏知人心已去日夜憂泣四月上半月服毒
藥死了其子海古拉將屍沈水中三日取出用香牛皮包裹嚇其死蹤昇行昨聞庫車回子已將海古拉

拏去原留庫爾勒之安集延大通哈胖色提一聞此信即將庫爾勒之糧倉軍火財物交白彥虎接管星夜馳赴庫車我等繞南面海沿子逃歸等情據張曜開吐魯番總回陸續自喀喇沙爾逃歸者又供四月初十內外怕夏在庫爾勒飲藥自斃怕夏之子率黨夥向西竄去白彥虎移踞開都河西岸與劉錦棠稟報相同是逆酋怕夏畏懼白晝確鑿可據惟逆孽海古拉經庫車總回拏去如何下落尙無確報頃復據張曜轉據阿克泌回目邁引報四月二十三日派薩吾提等五人前赴羅布淖偵探賊蹤見羅布淖伯克據稱老怕夏在庫勒死了小怕夏護屍西走將庫勒事務交白彥虎並派有阿克木管理小怕夏走到庫車有托胡的夏帶領庫車阿克蘇薩牙三處總回頭將小怕夏及和闐呢牙斯阿奇木伯克兩人殺了並將安集延人殺散其留在庫勒之阿克木得信即將銀錢交付白彥虎說庫車三處人現與小怕夏打仗我去一看就來想是不回來了查所供之小怕夏卽指海古拉庫勒卽庫爾勒也薩吾提等並言羅布淖伯克盼官軍早到並聞其子孫伯克三名五品伯克三名七品伯克三名花名清單呈閱連旬以來疊據各營偵報大略相同是逆子海古拉經庫車阿克蘇等總回截殺亦確鑿可據竊維安集延酋怕夏木浩罕四部之一浩罕既亡怕夏乘中原多故逆略未遑竟敢盜踞南疆招納潰兵叛弁盡取回部四千餘里據而有之與北路客回同惡相濟迨天戈西指不卽束身歸命遁歸故巢竟敢勾結漏誅逆回

白彥虎肆其狡猾公然抗拒及古牧大創烏桓廟子獲克爾復堅據達坂托克遜吐魯番各城隘遇大兵南下之鋒爲三窟深藏之計諸將士肅申天討甫及旬餘各城隘一律掃除而達坂之克無一人一騎得還老賊尤爲膽落比逆屬大通哈愛伊得爾呼里等勸其縛送白彥虎獻回南八城白顯而怕夏聞敗震懼計無所出又平時恃其詐力虐遇纏回搜其資財掠其男女靡惡不爲纏回怨毒已深至是羣思報復怕夏自有所聞憂懼無措決計自斃希免顯戮而逆子昇屍西窻中途復經庫車阿克蘇等纏回截殺是誠積惡滅身大網無漏也查怕夏自稱畢調勒特汗有子四人長咬哥次名咬都喇股魯急呼則海古拉第三子曾充阿克蘇伯克四子曾在吐魯番均不知名其留守本境之長子咬哥則尤非怕夏所愛也其留守喀什噶爾者則係何姓本前換防武員不知何時叛投安集延以其女改名色哩嗎罕妻怕夏聞現尙帶叛兵二千餘此外除安集延兵數千又有漢人五六千纏回萬餘人在彼耕種經商當兵均難辦回裝以自別據各路偵探所陳如此詳參核而識其大略尙未審其確否也安集延在浩罕各部中素稱强悍敢爲大言道光初張格爾爲變時即恃其部衆爲親兵與官軍抗部人以經商致富與泰西諸國通亦頗習其製造怕夏性暴而貪竊踞南疆八城後狡焉思逞不懂夜郎自大已也此次屢經大創自取滅亡回部內部已成瓦解之勢計八城中除喀什噶爾尙須重煩兵力此外師行所至當無敢再抗顏行者

劉錦棠張曜軍律嚴明盡心撫輯從賊中逃歸者隨時安集各處之被賊裹脅者隨時資遣計送歸烏魯木齊者二千七八百名口送歸哈密者二千五百名口皆給以牛種籽糧俾得各安生業遠近聞風景附不約而同察看情形南疆戡定有期差堪仰慰 聖慮又奏 上於五月二十四日欽奉 諭旨關外軍情順利吐魯番等處收復後南八城門戶洞開自當乘勝底定回疆殲除醜類以竟全功惟計費出於萬全事必要諸可久吐魯番固爲南路要隘此外各城如阿克蘇等處尙有可據之形勢否回曾報知怕夏縛送白彥虎繳回南八城之說是否可恃伊犁變亂多年前次未遑兼顧此次如能連盤踞並一氣呵成於大局方爲有裨該大臣親總師于自以滅此朝食爲念而如何進取如何布置諒早胸有成竹爲朝廷紓西顧之憂其卽統籌全局直抒所見以慰聖念等因欽此跪誦之餘具仰我 皇上睿顧西服 聖慮深達於保大之中庶馭邊之略欽佩何言竊維立國有疆古今通義規模存乎建置而建置因乎形勢必合時與地通籌之乃能極其輕重而建置始得其宜伊古以來中國邊患西北恆劇於東南蓋東南以大海爲界形格勢禁尙易爲功西北則廣漠無垠專恃兵力爲強弱兵少固敢戒心兵多又耗國用以言防無天險可限戎馬之足以言戰無舟楫可省轉饋之煩非若東南之險阻可憑集事較易也周秦至今惟漢唐爲得中策及其衰也舉邊要而捐之國勢遂益以不振往代陳蹟可擬按矣顧祖禹於地學最精淹

以其論方輿形勢視列朝建都之地爲重輕我朝定鼎燕都蒙部環衛北方百數十年無烽燧之警不特前代所謂九邊皆成腹地卽由科布多烏里雅蘇台以達張家口亦皆分屯列戍斥堠遙通而後畿甸宴然蓋祖宗朝例平準部兼定回部開新疆立軍府之所貽也是故重新疆者所以保蒙古保蒙古者所以衛京師西北臂指相聯形勢完整自無隙可乘若新疆不同則蒙部不安匪特陝甘山西各邊時虞侵軼防不勝防卽直北關山亦將無晏眠之日而況今之與昔事勢攸殊俄人拓境日廣由西而東萬餘里與我北境相連僅中段有蒙部爲之遮隔徙薪宜遠曲突宜先尤不可不預爲綢繆者也高宗平定新疆拓地周二萬里一時帷幄諸臣不能無耗中事西之疑聖意堅定不搖者推舊戍之瘠土置新定之腴區邊軍仍舊餉不外加疆宇益增常同可爲長久計耳方今北路已復烏魯木齊全境祇伊犁尙未收回南路已復吐魯番全境祇白彥虎罕其餘黨偷息聞都河西岸喀什噶爾尙有叛奔逃軍終煩兵力此外各城則方去虎口如投慈母之懷自無更抗顏行者新秋採運足供餘糧柄畝鼓行而西宣布朝廷威德且勅且撫無難望焉有之疆宇遐隸職方此外如安集延布魯特諸部落則等諸邸案之外聽其翔泳故區可矣英人爲安集延說者慮俄之蠶食其地於英有所不利俄方爭土耳其與英相持我收復舊疆兵以義勳設有意外爭辯在我仗義執言亦決無所撓屈至新疆全境向稱水草豐饒牲畜充

初者北路除伊犁外奇台古城濟木薩至烏魯木齊昌吉綏來等處回亂以來漢回死傷流亡地皆荒蕪
近惟奇台古城濟木薩商民散勇士著民人聚集開墾收穫甚饒官軍高價收取足省運腳餘如經理得
宜方始有復元之望南路各處以吐魯番為腴區八城除喀喇沙爾所屬地多礮瘠餘雖屬衍不及北路
而饒沃或過之矣官軍已復烏魯木齊吐魯番雖有駐軍之所而所得腴地尚不及三分之一若全境收
復經畫得人軍食可就地採運餉需可就近取資不至如前此之拮据憂煩張皇靡措也區區愚忱實因
地不可棄兵不可停而餉事既絕計非速復腴疆無從著手局勢所迫未敢玩愒相將至省費節勞為新
疆盡久安長治之策紆 朝廷西顧之憂則設行省改郡縣事有不容已者合無仰懇 天恩飭戶兵兩
部速將咸豐初年陝甘新疆報銷卷冊各全分及新疆額徵俸薪餉需兵制各卷宗由驛發交肅州俾直
得稽考因章按照時勢酌損益以便從長計議奏請定奪 上諭軍機大臣等左宗棠奏逆酋怕夏自
斃情形並統籌全局各一摺據情安集延逆酋怕夏經官軍擊敗後眾心離散遂於四月間仰藥自盡其
子海育拉率黨西竄亦被總回截殺等語該逆遁回眾佔踞南路各城肆其荼毒罪惡且盈今既窮蹙
自斃餘眾勢必渙散事機極為順利惟白彥虎尙踞開都河西岸該逆稔惡已久罪不容誅喀什噶爾為
叛升何姓所踞自應乘此聲威速籌殄滅左宗棠擬俟新秋採運足供鼓行而西刻下已屆秋令著即檄

飭各軍剋日進兵節節掃蕩各城寨素受逆酋脅制非盡甘心從逆此時大軍西行咸知効順自當分別
良莠剿撫兼施以安衆心白彥虎素稱狡猾務當設法就地擒斬毋任再行遠竄怕夏之子除海古拉外
尙有三人現在竄匿何處並著查明具奏左宗棠所陳統籌新疆全局自爲一勞永逸之計南路地多險
沃將來全局肅清經理得宜軍食自可就地取資惟目前軍餉支絀著南路一日不平則曠日持久餉既
兵飢亦殊可慮該大臣所稱地不可棄兵不可停非速復腴疆無從著手等語不爲無見著卽督飭將士
戮力同心剋期進剿並揆時度勢將如何省費節勞爲新疆計久遠之處與擬改行省郡縣一併通盤籌
畫妥議具奏所請飭部將咸豐初年陝甘新疆報銷卷冊各全分及新疆額徵俸薪餉需兵制各卷宗山
驛發交等語著戶兵兩部查照辦理將此山五百里諭令知之○解西征餉銀六十萬兩○丙辰諭前因
御史鄧華熙奏廣東省北被水情形當經諭該督撫查勘撫卹並據張兆棟奏稱本年三四月間廣東清
遠各縣因雨水過多圍基沖決田禾村落間被淹浸現已飭屬週歷查勘設法賑濟等語著該督撫懷遵
前旨將河隄決口速籌堵築以資捍衛並勘明被災輕重妥籌撫卹用副朝廷軫念災區至意○予故山
東巡撫吳廷棟入祀山東省城名宦祠○丁巳溫忠翰奏自去年以來直隸山東山西河南等省田禾缺
雨荒旱成災糧價日增流民徧野逮及今年直隸山東河南三省春麥少有收穫聞尙未能一律豐稔而

山西一省荒歉更甚於去年人情洶洶朝暮謀夕子女則鬻於路人攘奪或施於里黨啼饑者遠連數郡求食者動聚千人戶少炊煙農失恆業臣籍隸山西每遇本省人來言及實有耳不忍聞者本年四月經前任撫臣鮑源深奏請開倉賑濟嗣又經撫臣曾國荃奏請酌留京餉銀二十萬兩以濟賑需均蒙 允准在案仰見我 皇上惠愛黎元 恩同再造 命下之日凡督省之官京師者無不人人感激共戴

皇仁第臣愚以爲倉儲蓄積未必充溢京餉之酌留亦難爲繼臣聞督省至六月初旬尚未得雨秋禾半皆枯槁豐稔之望須待來年四野鴻嗷萬夫庚癸當此道殣相望民情無定之時倘有奸宄勾結煽惑爲患不可勝言且督省逼近京師尤宜預籌安集流亡俾各守其鄉里早救其窮迫無依之苦以噤消其起而爲盜之心庶不致別生事端方今籌款匪可易言而濟賑之需非鉅款不能普被再四思維只有開捐一法集資尙可稍裕惟捐例若照常兌收輸將難期踴躍亦有緩不濟急之勢可否請 旨敕下山西巡撫在本省暨鄰近各省開設捐局專備救荒之用其捐例請照甘肅各捐之例稍減成數准予實在官階由撫臣酌核所收捐款足敷辦理賑務或俟來年新麥告登小民安業卽行停止庶於常捐各局尙無大妨礙而三晉億萬窮黎咸欽 仁政之敷施共荷 湛恩之汪濊其危迫旦夕驚惶擾攘之心亦可稍定

上諭溫忠翰奏山西荒歉太甚請開捐助賑著戶部議奏○諭軍機大臣等溫忠翰奏山西各府州縣

連年亢旱賑卹饑民需款甚鉅前經會國奏准截留京餉二十萬兩誠恐不敷分撥除本省勸捐助賑外不得不預籌協濟查江浙釐金現撥南北洋海防經費請將此項借撥銀一二十萬兩以應急需俟各省捐款集有成數再行撥還等語省被災較重疊據撫奏報情形賑撫勢難稍緩溫忠翰所奏請撥海防經費接濟目前自係爲移緩就急起見卽著李鴻章酌量借撥咨照會國奏派員領解回省核實散放俟山西庫款稍裕卽行撥還○戊午諭前因會國奏山西亢旱情形當經降旨准其劃留京餉分別賑卹並諭令將被災各屬有無應行蠲緩錢糧查明具奏茲據御史胡聘之奏現聞該省州縣因錢糧可冀減免上緊催征爲捏報民欠侵吞入己地步至散給糧米時書役藉端勒索約令加倍償還致災民懼不敢領甚有願輸錢文求免領賑者近聞河南山東亦有此弊等語地方官撫卹災黎應盡心經畫以期實惠及民若如所奏各節殊出情理之外著該督撫認真訪查務將玩視民瘼及藉端舞弊之官吏等從嚴懲辦以儆貪污而恤民隱○己未會國奏查督省歷年災歉今歲五月各屬情形業已延不及待渥荷 聖慈准留京餉銀二十萬兩全活甚多與司道等宣布 皇仁歡動三晉之呼民有再生之慶其時惟冀早沛甘霖秋成猶可望也嗣奉 諭旨飭度誠祈禱勸求吏治清瑯庶獄以迓和甘欽此臣率同司道飭屬將連年積案趕緊清釐設壇祈禱四十餘日曾未少懈藩司林壽圖親赴管祠取水十二十三

等日連得小兩數次殊未深透始則冀幸可以補種蒔麥乃節屆立秋猶未普獲甘霖並此一縷生機恐
又將絕望矣赤地千里焦灼寸心被災既廣爲日甚長臣與司道連日籌商思維再四惟有仿照天津上
年賑饑成案請 旨飭部頒發虛銜實職空白實收執照二千張給 臣轉交藩司祇領辦理捐輸以資接
濟幸荷 聖慈 俞允 臣卽當督同藩司林聯圖署臬司江人鏡一面飭屬就地勸辦一面前赴商賈輻
輳之區勸賑管民之貿易他省者蘇杭桑梓之難如各省有急公好義情願樂輸者聽其自便兌銀出畢
卽可給予執照冀衆舉之克舉幸民命之易蘇是否有當伏候 聖訓祇遵 上諭會同藩司奏管省災區
太廣請仿照天津成案勸辦賑捐著戶部歸入溫忠翰摺一併議奏○李鴻章奏 臣承准軍機大臣字寄
六月十四日欽奉 慈安端緒康慶昭和莊敬皇太后 慈禧端佑康頤昭豫莊誠皇太后懿旨本月據
禮親王世鐸等奏遵議 穆宗毅皇帝 孝哲毅皇后神牌升神位次一摺又據醇親王奕譞奏府少
詹事文治鴻臚寺卿徐樹銘內閣侍讀學士鍾佩賢鴻臚寺少卿文碩國子監司業寶廷另行陳奏各摺
片已明降諭旨令醇親王奕譞恭親王奕訢醇親王奕譞御前大臣軍機大臣大學士侍郎翕同蘇夏同
善禮部太常寺將王大臣等所奏各摺片詳細閱看再行妥議具奏矣 廟制關繫鉅典必須考覈精詳
方足以昭慎重著再派李鴻章悉心妥議具奏禮親王世鐸等摺一件醇親王奕譞等摺片九件並侍郎

袁保恆等說帖五件均著鈔給閱看將此諭令知之欽此仰見 皇太后慎重鉅典聿求厥中之至意臣查禮親王等議增龕座志在斟酌事宜諸臣請改廟制意在考求古體要皆出於尊崇 祖宗之忱未易折衷定論以臣所聞禮文殘闕古制難詳七廟九廟之文漢世已無定說都宮別殿與同堂異室昔人亦互有是非卽朱子宗廟圖議馬端臨邱濬等皆病其過拘臣考周官匠人營國世室明堂皆止五室鄭注五室並在一堂據此則朱子所圖世室親廟以次而南似亦未必盡合古制至於特建 寢殿增修方殿等說更爲古制所無禮親王等奏稱侍講張佩綸請建世室事涉更張應毋庸議等因 宗廟事重未便輕議改作該親王等所奏不爲無見我 朝 廟制定於 國初 祖宗神靈協會一室已二百餘年一旦遷改 神明必有不安 太廟重垣周二百九十一丈殿陛庭墀各有定式皆一成而不可變今欲就增數室位置必難得宜又 升祔吉期理不宜誤載祀所稱不忍一日未有所歸者也平古酌今改廟實有難行禮緣人情可以義起因時立制自以仿照 奉先殿成案增修龕座爲宜議者或以簡略爲嫌臣考百禮制廟迭遷亦止改塗易楹並不大更舊廟今之龕座略如晉宋以來之坎室晉太常華恆建議議廟室以容主爲限無拘常數厥後王導溫嶠等往復商榷議增坎室宋增八室蔡襄爲圖此皆達禮君子度時之宜以成一代之典彼豈未聞世室親廟之說亦謂禮樂不相沿襲事異殷周禮從而變也今之增龕

實其比例或又謂 奉先殿乃古原廟之制與 太廟事體不同會典所載雍正十一年奏准 奉先殿
神牌供奉與 太廟理應並一是 太廟如 奉先殿制久有成憲可循不得謂 奉先殿可以增龕
獨不可倣行於 太廟也仰維 列聖家法皆 躬行節儉以先天下今日援案增龕之議事屬權宜意
從儉樸未必不當於 列聖降鑒之心廷議既已允諧似應無煩疑慮至祧遷之禮雖古之常制而藏主
之室則禮無明文鄭康成禮經大師其言周制祧主藏於太廟及文武世室是已祧之主與不遷之祖同
處一廟故廟亦名祧晉代之制藏於西儲夾室當時已疑其非禮後世竟沿爲故事儒家每謂祧於夾室
爲古制殆臆度之辭則既與古不同祧亦未宜輕議惟 太廟規制有定 國家統緒無窮醇親王議請
明降諭旨曉示天下自今以往親盡則祧並請以 後殿東西二梢間永藏祧主此則導 皇上以大
讓酌 廟制以從宜禮貴因時讓爲美德非天子不議禮應否 允行自應一秉 聖裁非臣下所敢妄
擬矣○奕際等奏六月十四日欽奉 慈安端裕康慶昭和莊敬皇太后 慈禧端佑康頤昭豫莊誠皇
太后懿旨本日據禮親王世鐸等奏 穆宗毅皇帝 孝哲毅皇后神牌升祔供奉位次遵有敬謹相度
會議具奏醇親王奕譞奏請定久遠至計詹事府少詹事文治鴻臚寺卿徐樹銘內閣侍讀學士鍾佩賢
鴻臚寺少卿文碩國子監司業寶廷奏敬陳管見各摺片著派惲親王奕劻恭親王奕訢醇親王奕譞御

前大臣車機大臣大學士侍郎翁同龢夏同善禮部太常寺堂官將王大臣等所奏各摺片詳細閱看再行妥議具奏等因欽此仰見 皇太后慎重典禮務求盡美盡善之至意臣等遵卽公同詳細閱看文治等摺片所議終多窒礙難行之處再四籌商惟有倣 奉先殿增修龍座成案尙有 成憲可循擬請仍照前議敬謹辦理特 廟中之規制有限我 朝之統緒無疆將來於萬斯年自當一循古禮爲久遠至計應如何著爲令典垂之萬世 聖心自有權衡應恭候 皇太后懿旨遵行欽奉 慈安端裕康慶昭和莊敬皇太后 慈禧端佑康頤昭豫莊誠皇太后懿旨前據禮親王世鐸等奏遵議穆宗毅皇帝孝哲毅皇后神牌升附供奉位次醇親王奕譞奏請定久遠至計詹事府少詹事文治鴻臚寺卿徐樹銘內閣侍讀學士鍾佩賢鴻臚寺少卿文碩國子監司業寶廷敬陳管見各摺片當派惇親王奕誼等再行妥議並諭令李鴻章議奏昨據李鴻章奏因時立制以增修 龍座爲宜本日據惇親王奕誼等奏請仍照前議辦理等語 列聖廟享 中殿龍位已與九楹之數相符該親王等奏請敬將東西各四楹仿照道光元年增修 奉先殿後殿龍座成案修理改飾卽著照所議行所有應行事宜著該衙門敬謹辦理至醇親王奕譞前奏 廟制規制有限國家統緒無窮請定久遠至計自今以往不援百世不祧之例各等語著將原摺片二件存軍機處並將此次諭旨及該親王摺片另錄一分存毓慶宮○辛酉諭丁日昌奏病

勢復劇請假回籍調理一摺丁日昌著實假三箇月准其回籍就醫福建巡撫著葆亨署理○允劉坤一奏於湖南新寧縣建楚勇專祠地方官春秋致祭○張家口兵房土廟被水沖沒諭瑞聯等趕修并撫卹災民○癸亥 上詣 奉先殿行禮○內閣侍讀學士榮溥奏請開缺允之○甲子左宗棠奏前統領湘軍廣東陸路提督劉松山於同治九年正月剿賊寧靈陣亡奉 旨著於陝甘等省立功地方建立專祠所部陣亡各員查明一併附祀欽此茲據西寧道劉錦棠稟稱已於寧靈縣及靈州城內擇地建立專祠均附祀該軍陣亡及積勞病故文武員弁勇丁三千一百四十二名撥給荒絕地各二百畝以供祭祀其吳忠堡地方亦撥給荒絕地一百畝以供該處埋葬殉事員弁墳塋祭掃之資同治十二年裁定河湟肅州該軍前後共陣亡及積勞病故文武員弁勇丁九百三十九名已於西寧各城建立忠義祠並祀提督劉松山於中撥給荒絕地六十五段水磨三盤以供祭祀又據河州鎮總兵沈玉道呈稱前統領楚軍後路果勇等營記名提督徐文秀於同治十一年正月剿賊河州陣亡奉 旨著照提督例從優議卹並准於死事地方建立專祠其同時陣亡之將弁勇丁並准一例附祀欽此遵於河州城中建立昭忠祠一所祀提督徐文秀於中附祀陣亡及查明河州城鄉殉難紳民婦女六十餘名價置水磨三盤為每年祠中香火之需據該員等先後續請具奏立案前來相應請 旨勅部立案以期久遠下該部知之○乙丑諭

額勒和布奏病難速痊懇請開缺一摺烏里雅蘇台將軍額勒和布著准其開缺調理○上請 慈寧
宮行禮○戊辰 上詣 奉先殿 壽皇殿行禮○沈葆楨奏直牧請仍准委署縣缺下吏部知之○諭
左宗棠奏山西藩司任意取巧紊亂餉章請飭部議處一摺山西每月應協西征餉銀自應遵照向章盡
力籌解據左宗棠奏山西藩司林壽圖到任後朦混具詳將該省應解西征餉銀按照同治六年每月二
萬兩核算置同治八年戶部核定每月五萬兩成案於不顧指實餉爲虛數巧避不及八成處分實屬紊
亂餉章請飭部詳查成案將林壽圖議處等語著戶部查明山西應解西征月餉歷屆成案據實具奏○
己巳減江蘇上元江甯句容六合江浦五縣被蠲被旱本年漕糧十分之三○允翁同龢回籍修墓○諭
沈葆楨奏訪查淮北鹽綱弊端並自請議處等語鹽綱關係緊要全在辦理得人始能日有起色茲據奏
稱本年接辦淮北癸酉綱分未能提早趲辦銷數日疲雖由上年歲歉及私販占引所致而官中之私弊
端不一相率因循亟應實力整頓卽著該督督飭司場各員掃除積弊務將本屆綱分提前趲辦倘竟不
知振作卽行據實參辦以肅鹺政沈葆楨自請議處之處著毋庸議○庚午 上詣 奉先殿 壽皇殿
行禮○李慶翱奏開封等府被災特甚籲請截留京餉及漕折銀兩允之○丙子浙江巡撫梅啟照奏同
治三年冬間前撫臣因洋面多盜水師戰船未修飭委升任參將張其光赴粵僱募紅單船十隻每隻勇

三十名共勇三百名配齊軍械管駕來浙分撥近海各郡巡緝奏明在案所有管帶官薪水雜支並船租勇糧等項每月支銀四千六百一十兩每年共支銀五萬五千兩軍火等項向不在內嗣張其光調赴臺灣改派候補副將張蓉光接帶刻下浙省洋面尙稱安謐水師各營自同治五年起陸續購造紅單廣艇釣船銅底艇船龍艚舡快蟹船各種費銀十八萬兩有零現有船七十四隻配兵出洋大者配兵五十名小者配兵二十五名並經閩省先後調撥伏波元凱兩輪船來浙差遣足敷巡緝現值經費分支絀不得不力求撙節應將前項由粵僱募之紅單艇船十隻截至本年五月底止全數裁撤以節經費報聞○丁丑潘鼎新奏據鄧署雲南提督前旗西右江鎮總兵二等男楊玉科文稱玉科原籍湖南靖州直隸州因祖父來滇貿易寄居麗江縣屬咸豐六年回匪倡亂玉科集團剿賊次第攻克大理各城所部兵練籍隸迤西者較多從征日久傷亡家屬殘廢弁丁無業可歸情殊可憫玉科屢捐廉籌款修建鋪房分別安置並於鶴慶浪穹交界之牛街地方添置田地暫行勻給耕種又劍川浪穹兩屬之喬后井係深山僻徑前經逆回挖礦煎鹽收復後玉科自行籌墊工本招丁煎辦每煎鹽一卯除納白井提舉正課外每鹽由薪工項下抽銀二兩五錢作還墊辦硿費電房租惠藉以添補軍需又大理府城杜逆所建僞宅一所業將磚石拆毀修建郡城其餘木植地基玉科添款修葺寓所暫資辦公竊憶頻年攻戰屢瀕於危全賴各

屬紳民敵愾同仇富者輸財貧者効力得以蕩平羣逆倖著微勞今之貧窮子弟其父兄皆効命於疆場
前人之戰血未乾後嗣之飄零誰卹玉科若不設法培植私心實有未安今擬將祖父在麗江所置田產
分給堂姪等居守祠墓及歷年自置產業不敢私諸己有所有大理府城自建公寓請改爲迤西所屬書
院其鋪房二十七間並牛街田六百一十一畝迤后井鹽池二十二處每年所收租息除納稅課錢糧外
均入書院作爲束脩膏火並文武舉貢進京旅費俾士子誦讀有資力圖上進等情前來當經臣檄行司
道分別飭查詳覆核辦去後茲據雲南布政使杜瑞聯詳准迤西道熊昭鏡咨據大理府知府毛慶麟麗
江府知府恆璋轉據太和縣知縣夏仕清浪穹縣知縣曹廷銓署鶴慶州知州李銘謙代理白井大使鍾
同瑜先後將大理府城房屋鋪面並牛街田地迤后井鹽池等項查明分晰造冊取具各州縣及佃戶印
甘各結由該管道府遞相加結移司詳請奏咨立案前來臣查前署提督楊玉科上年報効應領核准欠
餉銀四十萬兩餘經奏奉 諭旨飭部核議給予獎叙在案茲復捐助田產培修迤西所屬書院實爲一
時盛舉除將送到冊結飭司分別轉行該管道府州縣將每年應收租息銀兩並開支章程詳細數目再行
確查妥爲核議詳覆以期垂之永久再行造冊咨送戶禮部立案外謹會同雲貴督臣劉長佑據情恭摺
具陳下戶部議奏○戊寅九李鴻章奏銘軍勦番陣亡員弁於福建鳳山縣建祠列入祀典○己卯諭前

因左宗棠奏參山西藩司任意取巧紊亂餉章等情當令戶部查明具奏茲據奏稱同治八年二月間經該部奏定山西每月應協左宗棠軍餉銀三萬兩並原協糧餉普軍餉銀一萬兩又米價銀一萬兩實共應協西征軍餉銀五萬兩前山西巡撫鮑源深據布政使林壽圖詳奏稱每月止應解銀二萬兩與部定餉章不符鮑源深固屬失於詳察如林壽圖之貽誤軍餉實屬咎無可辭左宗棠所參該藩司任意取巧紊亂餉章請飭議處之庭請旨定奪等語山西布政使林壽圖不遵照戶部奏定餉章朦混具詳非尋常貽誤軍餉可比著交部議處前山西巡撫鮑源深僅據林壽圖詳請具奏不將歷屆成案詳為查核亦有不合鮑源深著一併交部議處○辛巳諭御史慶錫榮奏職役朦朧保請旨飭查一摺花翎驛運使銜道員用江蘇補用知府劉文聚原籍安徽曾在浙江嘉善縣充當門丁賸放朦朧保縣丞歷保今職實屬有干例禁劉文聚著先行革職並著兩江總督江蘇安徽浙江巡撫確切查明按律懲辦該部知道○壬午予故貴州巡撫曾燾光於貴州四川等省建祠由地方官春秋致祭○諭崇厚等查勘 福陵 昭陵城牆等處應修各工請擇吉興修一摺著欽天監於本年八月內選擇吉期先行知照即著盛京將軍會同工部侍郎屆期敬謹興修餘著照所議辦理○劉秉璋奏光緒三年五月以前捐監銀兩業已湊收軍需歸於報銷下戶部知之

八月癸未朔賞給資營米三百石○丙戌以旗務廢弛革土爾其特台吉圖普新克什克職○曾國荃奏督撫到任例應將藩司一切正雜錢糧盤查具奏仰蒙 恩命補授山西巡撫於光緒三年四月二十三日接篆任事後即檄飭藩司將實在庫儲銀兩按款造冊詳送並將各屬倉庫錢糧分委陽屬之道府直隸州互相盤查嗣據藩司林壽圖將司庫實在正雜等項銀二十一萬七千六百七十九兩六錢零分款造冊詳報前來上於六月二十六日親赴司庫按款逐一盤查均係實儲在庫並無虧缺挪移情事報聞○左宗棠奏欽奉光緒三年七月初二日 上諭左宗棠擬俟新秋採運足供鼓行而西刻下已屆秋令著即檄飭各軍剋日進兵節節掃蕩日彥虎素稱狡猾務當設法就地擒斬毋任再行遠竄等因欽此現據總理行營營務處總統馬步各軍西甯道劉錦棠稟稱扎兒遜各城攻克後擬乘勝進規南路八城祇因吐魯番新糧收穫時哈密巴里坤車馬轉運陳糧難於驟集正值駝隻歇廠轉運艱難無從設法又地本火居舊壤夏令炎威灼人未可急進擬俟八月初旬涼風解至各營糧運稍資裹帶當即獎帥師徒鼓行而西惟近據降回供稱逆回白彥虎一股分踞庫爾勒附近一帶該侯官軍進逼即翻山北竄伊犁綏來等處請即咨行北路軍營加意偵探截擊務遏竄蹤臣維安集延逆酋怕皇父子伏誅餘孽自無棄巢遠竄之事惟白逆一股分踞庫爾勒附近一帶極為散漫該逆悍鷙不足狡猾有餘現雖偷息

開都河西岸一聞官軍進逼其避兵鼠竄自在意中察看賊之竄路有三一西竄庫車阿克蘇一帶一迤西而北竄伊犁境內一東南竄羅布淖爾取道吐魯番界覓荒僻無人之境東竄敦煌以取通海藏之路就此三路而言如西竄庫車阿克蘇是本官軍追賊必出之途無庸別籌布置如旁竄羅布淖爾一帶地僻人稀逆眾盤旋山澤間難以警脫狡謀或不出此惟翻山而竄伊犁邊界以出昌吉綏來則地勢平衍道路紛歧難於遮截非預為擇要堵剿不可也上已密飭劉錦棠張曜於進兵時就近攔截遏賊奔衝免分兵力賊果西竄自當躡蹤追剿期於盡殺乃止如其回竄而南張曜所部及留後各營當相機截擊巴里坤哈密安西等處防營節節布置尚可無虞所宜預為籌策者北竄一著耳竊寇亡命狂奔急何能擇苟恃距賊過遠防患稍疏誠慮倉猝聞警將貽意外之患傳曰不備不虞不可以師此所宜慎也除飛咨幫辦軍務伊犁將軍臣金順暨駐精河之廣州副都統福珠哩嚴飭所部遠發偵探加意預防一遇回逆股匪竄近卽行截剿毋使一名漏網并飛咨署烏魯木齊都統臣英翰檄飭統領卓勝軍金運昌加意偵探防剿毋稍疏忽外相應請 旨飭下額勒和布保英英廉金順英翰一體加意嚴防以昭周密而覓全功 上諭左宗棠奏南路官軍剋期進剿請飭嚴防北竄一摺逆酋怕夏伏誅後白彥虎一股分踞庫爾勒附近一帶劉錦棠張曜各軍現在剋期進剿誠恐該逆避兵紛竄轉致蔓延左宗棠務當飭令各軍探

明賊蹤繞前截擊遇其旁竄以期就地殲除刻下怕夏既斃賊勢渙散未必甘受白逆脅制大軍西進雖可曉諭回衆但將逆首設法擒獻餘衆可從永滅使果白逆就誅各城自必聞風納款不致重煩兵力第該逆素稱狡猾恐其一聞官軍進發山西路翻山乘虛奔突則北路各城又形喫重著金順英翰榮全額勒和布申林多爾濟杜嘎爾保英英廉督飭各營嚴加偵探嚴密防範遇有賊匪竄出卽行實力堵剿毋任竄逸將此由六百里諭令知之○丁亥命文瑞慶林護送彤妃金棺奉移 山陵○以應解西征餉銀不遵部章革山西布政司林壽圖職○獲哥老會匪首崔華燾斬之○諭給事中夏獻綬奏賤役人等朦朧官職經內外臣工指名奏參者不一而足請申明出結之例等語向來職官赴部候選分發取其同鄉京官印結定例本極嚴明嗣後各省出結於候選分發人員取結時務將該員身家是否清白等確切查明不得濫爲出結以杜朦混而重名器○諭給事中夏獻綬奏請飭修水利以裕民食一摺據稱農田水利關係民生至計比年以來荒田遂漸招墾水利尚未盡興請飭實力請求等語各直省督撫府尹督飭所屬認真講求水利務當酌度情形將如何修復如何興舉之處悉心區畫妥爲辦理○戊子調錢亨爲山西布政司以周恆祺爲福建布政司國英爲廣東按察司○諭譚鍾麟奏買米賑饑懇免抽釐一摺本年陝西亢旱歉收民生困苦全賴採米運糧藉資賑濟現在譚鍾麟委員分赴湖南等省購運所有陝

西探買米糧經過湖南湖北河南關卡著該督撫等飭令各屬一概免其抽收釐金以裕民食○總理各國事務衙門奏等前於三月間遵諭具奏英國副使可否裁省一摺光緒三年三月十七日奉 上諭前經簡派三品銜候補五品京堂劉錫鴻充出使英國副使著改派該員充德國欽差大臣並賞加二品頂戴欽此欽遵由 臣衙門於三月二十一日恭錄 諭旨並鈔錄原奏咨行該大臣查照在案嗣據署蘇松太道劉瑞芬函稱奉寄出使大臣第六次公文交法國公司美江輪船遞寄茲查新聞紙內有美江輪船在江海口失事所帶公文恐已遺失請查案加兩補發等因復經 臣衙門於六月初二日將前項公文等件照錄補發亦在案茲據該大臣致 臣等函稱六月初六日接到南洋大臣來咨知奉 旨改派出使德國大臣並稱隨帶人員以繙譯為最要洋繙譯官已擬將總稅務司赫德所薦來之傅耶派充並請派同文館學生唐晉泰腰帶為中國繙譯官飭令作速起程前來以免延誤其他隨帶人員由總理衙門揀派兩員俾資贊助等因 臣等查同文館內設德文館最近且德文較難於他國故現在德館學生堪勝繙譯之任者尙難其選本年四月間 臣等與德國使臣巴蘭德會晤詢以各國欽差駐劄德國德國外務大臣與其來往文信是否必用德文抑可通用英法德等國文字巴蘭德答以英法文字亦可通用但須預先告知熟悉何國文字即用何國之文等語經 臣衙門鈔錄與該使臣問答節略函致劉錫鴻並

告以中國緝譯官可在法館學生中商擇等因茲該大臣來函欲派德館學生底音泰騰昌前往等查上年九月間奏定出使章程內開出使各國大臣所帶參贊領事緝譯等員應由該大臣酌定人數開列姓名知照軍衙門查核所有劉錫鴻調派之底音泰騰昌兩學生作為緝譯官正與章程符合自當飭令趕速整裝起程前往惟查該兩學生習德文雖通門徑而於緝譯漢洋文字恐尙未能精通等因商酌擬再添派法館學生慶常一同前往以備任使至該大臣所稱由軍衙門另派隨帶兩員等語查出使隨帶人員固以熟習洋務為上選然必該大臣素所深信性情契合之人方可期其得力且亦有所責成若由軍衙門代為選派殊與出使章程未符應請 飭下該大臣自行揀派奏調並知照軍衙門查核辦理以符定章得 旨如所議行○庚寅諭潘鼎新奏已故大員臨難不苟懇恩予諡建祠一摺已故兵部右侍郎黃琮於同治二年在雲南省城殉難曾經奉旨賜卹茲據奏稱該故員於咸豐元年間在籍辦理團練當省城被圍督臣殉難人無固志經該故員激勵兵民登陴固守力解重圍並倡議捐輸支持危局實屬有功奏梓黃琮著加恩予諡並准其於雲南省城建立專祠以彰忠藎該故員之妾周氏同時死難著給予旌表並准其從祀○壬辰 上詣 奉先殿 壽皇殿行禮○甲午崇厚奏東邊外自元年剿平東溝之後旋將廟兒溝通溝次第蕩平地方一例肅清流民均經向化所有邊外各地敬仰蒙 天恩准

予嘗律升科經前署將軍尙書崇實等遵照同治年間王大臣原議以邊外之所出供邊外之所需奏
派總辦邊務道員陳本植知府恆泰提督左寶貴督飭各委員分段緹丈並籌辦木稅等事以爲設官添
兵之費現經陳本植等逐一查清統計邊外前後升科各地共一百八十萬三千餘畝其新丈之一百二
十九萬八千餘畝每畝年收正課銀二分耗羨銀一分並於開辦之始每畝收壓荒東錢一吊按戶給領
地照俾令各安生業緣上年邊外畝收尙有壓荒東錢二十九萬餘吊展至今年秋後補交其前數年邊
外呈報升科五十萬五千餘畝之地從前未辦過壓荒今若概令補交未免徒滋紛擾自應仰體 皇
仁免其補交壓荒錢文以示體卹其原收每畝地租制錢三十文作銀三分現亦改爲正科銀二分耗羨
銀一分一體徵收以免畸輕畸重即將新舊升科各地分撥各廳縣實力稽徵除耗羨一分津貼州縣辦
公外每年應徵銀三萬六千兩有零至木稅來源漸少稅亦減少此項木稅並葦塘山貨糧食斗租燒鍋
各稅均進預定成數一時只有儘徵儘解試辦一二年後當再察看情形酌定稅額惟邊民甫經向化良
莠不齊撫綏彈壓均關緊要雖經部議准設安東寬甸懷仁通化四縣而地方寥闊仍恐鞭長莫及應於
離縣較遠之處添設分防各官捕拿盜賊並稽查賭博彈壓地方庶幾星羅棋布免致顧彼失此之處並
將 奏准之道標馬步各隊簡練成營以資鎮攝其兵不敷分布之處已由奴才 崇厚酌派各軍並旗綠

練軍扼要駐守現 興京副都統與東邊道均充將軍翼長無論旗綠各兵該副都統暨該道可節制調遣但該道簡練官兵稽徵木稅葦塘糧貨等稅一年之間南北分巡周歷邊隘吏設之 興京撫民同知鳳凰直隸同知自理地面徒罪以上刑名案件均解鳳凰城由該道審轉若該道在外分巡委員代訊仍由道核轉俾免疎虞其分隸 興京鳳凰廳屬各州縣徒罪以上各案自詳由該同知審轉東邊一帶各廳州縣遇有匪徒聚眾及搶劫滋事決不待時之案應仍由東邊道就近審明稟請辦法庶足以鎮壓地方此次陳本植因公晉省當經奴才等向其逐細商推通盤籌畫目下地畝既經查清所有地方應行興辦各事自應趕緊籌辦以免稽遲所需款項即在辦理善後餘存邊外壓荒木稅葦租及各雜稅項下動用並查歷年所徵邊外每畝二十文地租原備邊務之需前已陸續動撥所存無多即可統充此項費用免再另請他款以符原議計修城垣衙署營房各費共需十五萬數千餘兩現在邊務所存餘款尙屬不敷應於今秋明春續收各項稅款再行奏撥動用至各廳縣起程錢糧係屬止供將來應備道標馬步隊餉乾之用不敷銀兩再由木稅項下動支其耗羨一分原係津貼各廳縣辦公嗣後邊外各縣養廉俸工役食馬撥等款即在一分耗羨之內支銷 興京鳳凰兩廳徵收無幾該同知並東邊道及教佐各官養廉俸工役兵等款應歸各項稅款動支按年造報以昭核實除道廳州縣等官應即遴員試署並撰擬字

標咨部頒給關防印信外所有缺分繁簡並添設分防振興學校以及修城垣建衙署蓋營房立馬撥暨廉俸餉乾各事宜詳加擬議謹繕清單恭呈 御覽下部議奏○乙未諭丁日昌奏請將濫募勇丁浮用夫價之總兵革職並自請議處等語留閩補用總兵張升楷於接統臺北各軍時招募勇丁輒任聽軍功莊建升濫募充數該總兵並有浮用夫價情事實屬咎有應得張升楷著即行革職以示懲儆丁日昌自請議處之處著毋庸議○諭何璟等奏請將臺灣府屬同治十年分民欠供粟豁免等語加恩著照所請所有臺灣府未完同治十年分供粟三萬九千一百七十一石零及未完糯米易穀十五石零均按數一體蠲免以紓民力○湖北巡撫翁同龢卒予卹如例賞其孫奎係舉人○以邵亨豫爲湖北巡撫○崇厚等奏奉省東邊外各田畝業經開墾多年民間有無相通彼此互賣早有其事從前未經設官民間均係私立白契今已舊律升科准其認地承種並經給發地照呈繳押租錢文民間互相交產既所不免若不查照向章一律稅契則倒兌遷移戶口無從稽核實於徵收錢糧有礙現如鳳凰廳所屬各地已有民人赴案投契因未飭發契照無憑辦理經總辦邊務候補道陳本植稟請核辦前來奴才等查民間置買田地畝例應納稅再價銀一兩收稅契止誅銀三分如係錢價按制錢一串作銀一兩核算奉省內地各屬州縣向由府尹衙門飭發契照黏戶納稅截報呈驗應經辦理在案今東邊外各地畝欽奉 諭旨無

論旗民凡認地開墾者一體編入戶口冊內等因自應欽遵仰體 皇仁因勢利導所有東邊應設各屬州縣所屬民間認地升科各戶置買房地均由府尹飭發契照一律照章稅契以順輿情而昭核實報聞○內中王家驊奏臣前以京師昭忠祠歲久應修奏蒙 聖諭飭部議奏近聞部臣議緩自係從撙節國帑實濟軍需起見惟臣前聞是祠情形親往恭視數次目睹前垣坍塌人畜無禁 旌忠之地作踐不堪御碑之下亻越尤甚但以章奏有體不敢盡言且恐血戰之士聞而寒心也今既部議緩修若是尋常善舉無關 國事人心又實無可再計臣何敢屢瀆 聖聰惟微臣竊計是祠二門以內殿廡尙可支持前面正門尙在若先將傾垣角門修補禁止人畜闖入需費不致過多伏望 皇太后 皇上聖裁先飭修是祠前面牆垣禁止人畜闖入作踐其餘各工俟庫款稍裕酌辦出自 聖慈垂憫忠靈至意則感激者不獨忠魂矣臣家先世並無入是祠之人言非有爲而發合併聲明下部議奏○戊戌左宗棠奏臣於肅州行營欽奉光緒三年七月初三日 上諭總理各國事務衙門奏左宗棠請借英商匯豐銀行五百萬兩前據奏明每月給息一分二釐五毫現接該督緘稱匯豐行係每月一分行息因該行只允借番銀甘肅向不使用道員胡光墉復向德商泰來洋行商令包認實銀每月加息銀二釐五毫而匯豐行商人擬定照會文稿文稱恩銀每年不過數目各殊現已將分晰緘致英國使臣情形緘復該督等語借用

洋欸若辦理稍未周妥及數目參差所關出入甚鉅此項息銀或以年計或以月計及如何支給之處著左宗棠查照該衙門緘詢各節迅速詳查一切奏明辦理原片著鈔給閱看欽此臣伏查此案未奉諭旨之先准總理各國事務衙門飛緘詢問前因比即照錄馳詢道員胡光墉茲據覆稱此項借款雖是一事惟原借仙令係英商匯豐洋行繼包認實銀係德商泰來洋行英商計息只按年一分者由於樂用仙令冀價高獲利德商計息必按月一分二釐五毫者由於包認仙令預備價落賠墊也胡光墉慮軍餉緊急既請以每年一分之息照會英國成借及慮仙令價值無常吳日歸還增累故加為每月一分二釐五毫之息包給德商承認首尾本屬一貫惟前次稟呈匯豐行擬定照會文稿未經聲敘明晰以致數目參差臣接胡光墉此次來稟檢其前後各稟詳加考核覺其中原委均屬實在情形此項借款上海英領事暨匯豐行付銀必須駐京英使知照而駐京英使必須總理各國事務衙門知照駐京公使之文一則照錄奉諭准借一則聲明磅數息數共二件臣已於六月內據胡光墉稟呈匯豐行擬式鈔請照行在案現據胡光墉稟七月二十四日正限將逾欽奉諭旨轉行之文已經到滬惟磅數息數明文尚未見到倘至九月半後展限又逾而磅數息數明文遲到誠虞罰銀三十萬兩難以收回而議借之五百萬兩亦難理觀臣覆核屬實應請飭下總理各國事務衙門查明前項照會如尚未行即飛行駐京英使查照

速行免致逾限別生枝節不勝激切待 命之至得 旨如所議行○已亥諭大學士寶鋆等奏內閣大庫失去物件請飭拿犯究辦並自請議處一摺據稱內閣大庫尊藏 寶錄 聖訓本月十三日值班中書赴庫恭請 寶錄見內外庫門封條脫落鐵鎖均有撥動情形當經檢查失去包袱二百十八塊等語紫禁城內竟有匪徒潛行偷竊實屬不成事體該犯係由何門出入何以值班官兵毫無覺查並有無別項情弊著前鋒統領護軍統領確切查明具奏並著步軍統領順天府五城一體嚴拿賊犯務獲究辦寶鋆等並失於檢查之侍讀鍾秀等均著交部分別議處禁城重地理宜嚴肅嗣後該值班大臣等務當隨時認真整頓督率官兵實力稽查如有閑雜人等潤迹往來卽行嚴拿懲辦倘敢仍前疏懈定惟該值班大臣等是問○庚子賞綬建城將軍瑞聯於紫禁城內騎馬○祭告 后土遣成林長叙行禮○辛丑丁日昌奏請頒給福建致用書院匾額允之○甲辰丁寶楨奏 等於光緒三年四月二十九日將馬邊夷務情形暨委員接署文武各缺緣由附片具奏六月十八日差弁齎回原片內開軍機大臣奉 旨知道了欽此謹卽轉行該廳營暨各營將領一體欽遵去後伏查馬邊夷地縱橫千數百餘里地勢險要其間種類繁多漫無統率前據各營報稱左右營夷匪雖已回巢仍復狡詐遷延意存觀望自非恍以軍威離期懾服且查從前建置左右兩營相距一百二十里各距廳城亦一百二十里又於距城六十里當衝隘

口安設核桃汛居中控制互為犄角規畫極為周詳自咸豐四年該汛失陷未經收復不惟左右兩營隔絕不通糧營亦四面受敵遂致夷餓日張臣此次詳稽圖志默審戎機以核桃汛為夷匪所必爭非收復該汛不能扼其吭非分道合攻不能搗其穴當於各將領稟內明晰批示嚴飭穩慎進取旋據統帶靖武營候補道周振瓊稟稱到防後悉心籌議知左營一路夷匪最强欲進攻核桃汛必先據火石墩而後節節疏通可期得手隨率所部左營同管帶武字副前營提督胡國珍扼紮大有汛其右營一路派所部右營及管帶達字新前營總兵黃三秀分紮大鴉口天保寨等處派營參將陶春廷及驍勇百名紮煙岑汛走馬坪兼防運糧要路五月初九日周振瓊胡國珍山大有汛分隊從溜沙坡菜子壩兩路進發即有夷匪千餘嘯聚林巔木石兩下各勇丁奮力爭先連環策應轟斃夷匪多名立將火石墩奪獲周振瓊當與胡國珍暫住花椒坪遙望核桃汛緊接來斯岡危峯對峙奇險異常中隔一溝曲折蜿蜒兩岸巒房如櫛周振瓊分道以火攻取勝隨於二十七日各派七成隊令提督張錫卿守磨子坪令遊擊陳樹勳領隊跨山而下胡國珍率總兵唐珊峯沿南岸而進副將羅志珂及驍勇軍功呂承先繞北岸而進行抵雙河場即拋擲火蛋火箭將兩岸夷巢焚燬風高火燥烟霧迷漫該夷抱頭狂竄時陳樹勳轉戰而前另有夷股盤踞來斯岡滾放木石各勇冒石前進鎗礮橫施逆勢不支紛紛敗竄我軍遂會合追殺當將核桃

汛收復翼日仍派陳樹勳羅志珂等山樁子處至二十里外沙庄唐珊峯等至十里外之中營溝掃蕩而
前計兩日平燬夷房數百座斬賊百餘名奪獲糧食牲畜刀矛多件前後陣亡花翎參將張連芳都司蕭
俊湖守備王泰益及勇丁十五名此左路由火石墩規復核桃汛之實在情形也至右營一路則以黑泥
溝天星橋爲最險其著名夷匪則小木下水陸根兒六鐵等支而夷酋那六二娃尤稱獷悍五月二十二
二十三等日黃三秀探知大鴉口外乾河溝聚集夷匪數百隨帶勇跟追敗之於現牛坪巴旗埔等處旋
聞黑泥溝老果防範不密六月初七日約會靖武右營各派勇五成渡河進剿令哨弁章世榮選勁勇四
十名埋伏黑泥溝山徑而自率百長滕紹揚等行抵天星橋該夷傾巢出戰我軍刀矛並舉鎗礮齊施轟
斃二十餘名生擒二名更有夷酋指軍逆眾拚命抵敵章世榮從後山攀緣直上前後夾攻鎗斃夷酋割
取首級各逆始紛紛奔潰章世榮往來衝突又陣斬五名緝斃十餘名立將兩處夷堡百餘座焚燬殆盡
卽有呀納巴赫兩支請營乞撫救出難民十八名奪獲刀弩蠻刀氍衫百餘件陣亡勇丁七名受傷三十
二名查驗首級卽屢抗官兵之那六二娃而參將陶春廷及靖武右營十一日又於魚濠口橫山壩獲勝
此右路疊次獲勝陣斬夷酋之實在情形也周振瓊等既復核桃汛於六月初七初八等日分隊搜山敗
賊於紫煙坡中河十六日又傳令各帶五日行糧由核桃汛進剿花板岡以達三河口三河口者卽馬

邊左營城署也維時兵分三路以陳樹勳合所部右營出溜沙坡爲一隊呂承先率屬勇及所部左營出核桃汎爲一隊胡國珍令唐珊峯等出磨子坪爲一隊沿途夷卡林立我軍奮勇前驅敗其守卡之夷將左手沙壩子右手新場野豬池堅巢焚燬向三河口進攻勇目安添壽手刃執旗夷目陳樹勳唐珊峯等分投痛剿各有斬獲遂整隊由雙土地直抵三河口營城與左營會合計燬夷巢千餘座焚其牲畜糧食器具甚多斬敵數十名奪獲接鎗氈衫氈子弓箭皮袋二百餘件陣亡勇丁七名等情先後具報前來臣等查核桃汎自咸豐四年被夷占據於今二十餘年該夷恃險猖獗附近村舍爲墟今幸仰仗天威恢復舊制各將士歷險入深疏通大路洵爲出力臣伏查夷人本多强悍而自核桃汎以外山深營密該夷於我軍出隊時往往潛伏不動及至兵勇收隊則四面圍集截我後路稍疏防備卽爲所乘是以我兵受傷亦多地勢使然臣恐路險兵單現又添派達字營總兵張祖雲率該部右營及親兵二百名統帶親兵營副將李忠楷率親兵二百名馳往左右路隨機助剿並以沙匡一帶悍夷現麀聚其中必須大加懲創庶足以收全功當經授以機宜嚴飭各將領乘此聲威認真剿辦一面令已降夷衆招撫被逼及素來安靖夷支並多張示諭解散從務使該夷畏威悔罪歸誠乃可審度情形妥籌善後以期仰副聖主綏靖邊圉之至意上諭丁寶楨飭令各營乘此聲威迅將沙匡一帶聚匪盡數殲除毋留餘孽一面安插

降察解散科從妥籌善後事宜俾地方日臻安謐○載治景廉奏光緒二年七月二十五日奉 旨崇文門正監督著載治去副監督著景廉去欽此欽遵奴才等當卽嚴飭委員等認真稽查竭力整頓以期關稅充裕無如京外銀價懸殊商販畏累大半裹足加以外國貨物均由天津納稅及崇文門分口例不重徵更兼各省產貨之區多被災歉是以錢糧較前仍復短絀查前任監督德本楚克扎布等將短徵盈餘銀兩奏懇 聖恩儘收儘解奉 旨允准在案嗣因戶部奏請關稅情形照常徵收不得援案辦理奉

旨各關均宜設法整頓仍遵額定稅數照常徵收不准以儘收儘解違例奏請等因欽此欽遵亦在案奴才等自光緒二年八月初三日起至光緒三年八月初二日止計十二箇月一任期滿共徵收正額銀十萬二千一百八十七兩五錢六分二釐收盈餘銀七萬三千二百十二兩五錢一分統計正額盈餘共實收銀十七萬四千四百兩七分二釐比照歷年正額尙無虧短計少收盈餘銀十四萬五百六十四兩四錢所收銀兩除一切官用均照歷年核改章程開銷外照例儘數解交戶部再徵收海運藥材燒酒錢糧除交正稅外餘銀七十三兩二錢六分罰項存公銀三十四兩一分一併解交戶部以上各款除咨部核議外謹另繕清單恭呈 御覽所有奴才等徵收盈餘雖儘數解交較之去歲微增惟因京中銀價遞增貨值昂貴商乏營運物鮮銷售加以外國貨稅例不重徵又兼本年荒歉過重商運維艱以致徵收盈餘

仍未足額又奏前據海巡拿獲前粵海關監督文鈺總辦家人李瑞漏稅箱篋等件經奴才等奏准入官變價在案遵卽飭商估變共估銀五千九百兩合庫平銀五千五百四十六兩除三成充費外共存公銀三千八百八十二兩二錢擬請作爲另款解交戶部得 旨載治等奏崇文門徵收稅課盈餘未能足額著戶部議奏○乙巳 上詣 壽皇殿行禮○載治等奏崇文門每年應交同樂園節省銀八千兩於道光二十九年八月初六日奉 旨崇文門每年應交同樂園節省銀八千兩著自本年爲始於此項內分交待衛處二千兩仍以六千兩交內嚴查收每年均照此辦理欽此欽遵在案此項銀兩奴才等如數備齊遵例解交內嚴六千兩其餘二千兩知照侍衛處查收報聞○丙午諭吏部奏陽省調署知府與例未符聲明請旨一摺前據沈葆楨等奏福建臺北府知府請以江蘇海州直隸州知州林達泉試署係爲新設海疆要缺因地擇人起見林達泉著准其試署嗣後不得援以爲例○己酉諭本年山西亢旱爲災甚重曾准曾國荃所請截留應解京餉銀二十萬兩並令李鴻章籌撥銀十萬兩助賑河南被災復准李鴻章所請暫留未解京餉及漕折銀共十四萬七千餘兩以資應用惟念災區較廣饑民嗷嗷待哺實堪矜憫朝廷軫念窮黎深恐未能遍及致令失所著戶部卽行籌撥銀二十萬兩李鴻章再行籌撥銀二十萬兩作爲該兩省賑款山西情形最重河南情形稍輕所有此次備賑銀四十萬兩以七成撥歸山西以

三成撥歸河南由戶部李鴻章照數分撥曾國荃李慶翱得此鉅款務當督飭在事各員激發天良核實散放俾閭閻得霽實惠毋任中飽本屆起運江安漕糧並著截留四萬石由李鴻章會同曾國荃設法運解山西以備賑濟之需至山西河南災黎待食孔殷凡有商賈運赴晉豫米石經過地方著各該督撫飭屬暫免抽收稅釐期於商販暢行藉資接濟○賞給普濟堂功德林二處粥廠小米五百石蘆溝橋粥廠粟米四百石資善堂小米三百石○賞給通州王恕園等處粥廠秬米二千石○賜卹琉球遭風難民○山西省設立候審公所○辛亥諭賀壽慈奏陳管見一摺所陳肅吏治求將才廣儲積嚴保甲各條不無可採為政首在得人地方各官之賢否與民生之休戚相關亟應慎選賢能以裨治理著各直省督撫府尹於所屬各員悉心考核如有勤求民隱治行卓越之員即行據實保奏候旨擢用倘所保各員有庸劣不職致干私罪者即惟原保大吏自問各省武職各員亦宜認真遴選儲備將才並著統兵大臣各省督撫隨時考察如有堪膺專閫之員即行出具切實考語奏明請旨簡用近年各省水旱頻仍民生困苦良由素鮮蓄藏以致一遇歉歲民食卽虞匱乏嗣後著各該督撫府尹飭令所屬各員講求積穀事宜以為未雨綢繆之計辦理保甲為地方要務並著督飭地方官實力舉行○壬子諭本年各直省旱潦為災山西河南被旱尤重業經撥款購糧藉資賑濟並諭令各該大吏督飭在事各員核實散放以期實惠均霑茲

據司業汪鳴鑾奏稱積習相沿其弊不一而足如捏造虛戶冒領賑銀逃亡遷徙戶冊重複冊費則按戶
缺錢折放尤易上下其手種種弊竇在所不免著該督撫各就被災地方情形明定辦賑章程通飭各州
縣認真經理並嚴密訪查如有前項情弊立即據實嚴參按律懲辦以重帑項而恤民生○是月日本國
使臣森有禮回任

九月癸丑朔諭本年山西河南亢旱迭經撥款分別籌辦賑卹近聞河南被旱成災與山西亦復相等民
間乏食輒沛流離幾至轉徙溝壑本屆起運江安漕糧八萬餘石除撥給山西四萬石外下餘四萬數千
石著儘數撥給河南山李鴻章李慶翱設法運赴該省以備賑濟前諭戶部李鴻章各撥銀二十萬兩以
三成撥歸河南現在該省亦乏現糧所有部撥之二十萬兩著全數解交山西其河南應分之六萬兩著
一併改由直隸二十萬兩內劃撥統作該省購糧之用李鴻章即將此項銀兩派員赴奉天採買由水道
運至河南以期迅速如一時不能購足或將直隸現買平糶備賑糧石先行抵撥著該督酌度辦理○甲
寅諭本年入秋以來雖經得有雨澤尙未霑足山西河南陝西等省亢旱成災至今未得透雨所盼望
焦灼實深允宜虔申祈禱朕於本月初四日親詣 大高殿拈香 時應宮著派惇親王奕諒 昭顯廟
著派恭親王奕訢 宣仁廟著派惠郡王奕祥 凝和廟著派貝勒載治同於是日分詣拈香○金順奏

去歲攻克古牧地烏魯木齊瑪納斯等城除陣亡員弁兵勇應得卹典另案奏請 恩施外其骸骨並傷
病殘廢弁勇茲各按籍具派配名提督劉占魁等分起遣送歸里量程站之遠近官階之大小均給川資
俾免窮途淹滯惟迢遙萬里關山難越傷殘跛蹙者情尤可憫須沿途給付車輶以廣 皇仁而示體卹
得 旨如所請行○乙卯諭前因山西藩司林壽圖素亂餉章朦詳取巧業經部議革職茲據會國荃奏
稱林壽圖詳陳原委係照案辦理並鈔錄前詳呈覽等語已革山西藩司林壽圖既以並非取巧朦詳置
辯自應查明宣示方足以折服其心著戶部按照摺單所開確切查明據實具奏不得稍涉迴護○丙辰
上諭 大高殿拈香○丁巳左宗棠奏 臣以菲材恭承 恩命督辦新疆軍務自忖才力不逮不副其
志又衰病餘年智慮日絀值茲時艱孔棘每深顧此失彼之虞幸蒙 天恩簡派劉典幫辦陝甘軍務駐
鎮蘭州而後根本有託 微 臣得以遍赴關塞竭効以赴事機劉典本 臣同心素交會稽陝西撫筴於漢
回情形素所洞悉兩省將吏長短又所深知故措置必當人情而軍民悉臻安謐 臣軍欠發歷年勇餉八
百餘萬兩經 臣疊將各統帶營官薪水辦公銀兩及勇丁虛名截贖陸續扣補補截至上年二月 臣啟
行赴肅時止尙懸欠四百餘萬兩劉典精心簡核輪調各營赴省點驗汰弱留強按名算餉存候給領通
計一年有奇不但欠餉無增而舊欠且核減一百數十萬兩撤退冗雜歸併成營士氣益奮並於時修葺

省會外城一律完整未資民力節省經費又近二十萬兩每過各省關協餉解到先運肅州以濟前敵餉
需採糴轉運各巨款雖當艱難拮据之秋而漢回安戢兵勇無譁則劉典之力也陝西撫臣譚鍾麟勸求
吏治深念民艱籌兵籌餉惟知以大局爲重每聞臣與金順飭需之必力圖接濟分甘絕少憂患與共
僅收協款緩急協宜數年以來疆宇乂安輿情綏靖俾臣得壹意籌邊無庸分心內顧則譚鍾麟之力也
茲值新驛軍事機局順利裁定可期合無仰懇 鴻施先加甄叙幫辦陝甘軍務二品頂戴太僕寺卿雲
騎尉世職阿爾圖阿巴圖魯臣劉典應否 加恩從優獎勵頭品頂戴陝西巡撫臣譚鍾麟應否 賞戴
花翎伏候 聖裁至辦理西征糧臺陝西布政使蔣凝學會辦西征糧臺辦理軍需局布政使銜陝西陝
安道沈應奎於臺局一切事務經理妥速遇有緩急隨時稟商撫臣並體接濟並息借商款維繫軍心委
駐湖北辦理陝甘後路糧臺二品頂戴湖南卽補道王加敏自咸豐十年隨征江西安徽浙江福建廣東
經理軍臺局事宜嗣復辦理陝甘後路糧臺事務事必躬親不避勞怨餉源涸絕必多方設措挪借巨
款以濟要需因駐鄂辦理糧臺未及到省以故湖南無補缺之期合無仰懇 天恩加以甄錄蔣凝學可
否 賞加頭品頂戴沈應奎可否 賞給從一品封典王加敏可否改留湖北以道員過缺儘先題奏之
處伏候 聖裁頭品頂戴甘肅布政使崇保布政使銜甘肅按察使史念祖布政使銜陝西按察使裕寬

布政使銜蘭州道瑋武籌辦餉需毫無疎誤均請 旨飭部從優議叙以示鼓勵其關內外各局辦事出力各營防務認真及各省護運委解妥慎周詳文武員弁容俟查明具奏再懇 鴻施 上諭左宗棠奏後路籌兵籌餉各員懇恩獎叙一摺新疆軍務順利幫辦陝甘軍務太僕寺卿劉典等在後路鎮撫軍民籌兵籌餉均屬著有勞績自應先加甄叙劉典著賞給頭品頂戴陝西巡撫譚鍾麟著賞戴花翎陝西布政使蔣凝學著賞給頭品頂戴陝安道沈應奎著賞給從一品封典湖南補用道王加敏著改留湖北以道員過缺儘先題奏甘肅布政使崇保按察使史念祖陝西按察使裕寬蘭州道瑋武均著交部從優議叙餘著照所議辦理○丁寶楨奏川省財賦除丁糧之外惟以鹽務爲大宗從前地方無事清黔兩省多銷川鹽就黔省而論如黔西大定遵義仁懷等府屬川商設號行鹽山永鹽蔡江等處轉運每年銷引數萬張上裕庫欸下便民情地方亦覺安靜自軍興以來黔地處處被擾人民離散死亡十不存一商人歇業引滯岸懸直同廢棄而川省之利盡失所賴濟楚一舉稍資安集近年兩淮議請規後准綱屢准部咨令設法籌辦停止濟楚維審時度勢未能遽行然亦終非長策而清查邊計各引積滯八萬數千張積欠羨節一百數十萬兩雖日事迫呼而引既未行從何籌補臣到川後親商力之困竭念邊岸之廢弛又見川省私販日充地方時虞不靖竊擬設法整頓因思滇黔兩邊同行川鹽均應舉辦然當此欸項支絀成

本雖籌若滇黔同時並舉力量萬有不逮現在先於黔邊試辦官運設局分銷俟有規模鹽本可敷挪騰再籌滇岸期復舊制惟事屬創始措手殊難非清正強毅精明練達之才不足以資委任茲查有四川候補道唐炯籍隸貴州於川黔兩省邊勢民情洞澈無遺而才氣亦足以濟事當飭該員會同藩司程懋鹽茶道蔡運年悉心籌議去後茲據該司道等詳稱車興以後川省邊鹽引岸曠廢已二十餘年現議規復實同創始就黔岸而論從前川鹽行銷由永寧縣前進者為永岸由合江縣前進者為江岸由涪州前進者為涪岸由綦江縣前進者為綦岸四岸行商各十餘家悉是陝西大賈資本甚鉅迨值黔亂相率歇業秦中又遭獮亂家產蕩然不能重整口岸近年每岸雖有數家多屬川黔之人湊資朋充本非股實稱貸不易加以水路險遠輸運艱難此其不能暢行者一邊商行引除本省盤課外商人領引有費引底有息開筭驗截有規踵事遞增任意需索一入黔境經過處所盤卡林立如布網羅而黔岸通歲盤金並花布木植大宗不逾十萬無補公家加以關稅之重徵官吏之苛派土蠻地棍之把持需索商本動致虧折往往視為畏途此其不能暢行者又一近邊計岸壤地犬牙計商鹽本較輕輒以計鹽侵濫黔界邊販遂就輕避重實計鹽邊商亦停攔正引重照影射加以船戶盜賣攪雜泥沙誑報漂溺串局為奸如合江之雷都黔江津之白沙毗連南川之木洞彭水之郁仙鎮向為私販捷徑盤踞透漏他若黔之興義郎岱獨

山一帶近濱者有滇鹽攬越近粵者有粵鹽攬越此其不能暢行者又一今欲重整黔岸商力既窮非設局試辦官運不可爲力欲辦官運非掃除從前積習亦不能見效該司道等博訪周諮酌議章程十五條呈請察核具奏前來臣詳加披閱大要以局運商銷力裁浮費疏通引岸禁止私索爲扼要之圖且清釐積引以杜重照之萌兼辦計岸以遏影射之漸裁局卡立船行以暢運銷之路嚴交盤慎出入以絕侵欺之源而又酌核帶銷以清積滯分認奏銷以專責成所議極爲周密果能認真舉行則黔岸自可漸復邊引不致積欠裕課便民無等於此自應查照試行臣現擬於瀘州設立黔邊鹽務總局委唐炯前往駐紮督辦官運商銷鹽事宜並刊發木質關防以昭信守所有永綦合涪江南六岸及本行邊引之西秀彭黔納谿暨近邊州縣計引悉提歸總局轉發配運以一事權並於產鹽之富順犍爲兩廠每廠設立購鹽分局綦江涪州合江永甯江津南川六岸每岸設立售鹽分局凡給票配行收鹽發商驗票緝私等事各委幹員分司其事並將局辦各岸奏銷由局自行專辦俾專責成其從前各州縣積欠改歸局辦各邊計之引張及羨截稅課各銀兩均應隨時會商司道核辦由臣飭鹽道詳細查明引數銀數分年分成帶還以示清晰其一切應辦各事宜統由唐炯調度惟此次山川辦理官運係爲疏通黔岸而設所有川省州縣關卡一切漏規浮費詳細裁革而黔中自兵燹之後因餉項支絀不得已抽收鹽釐商人運鹽到岸見

十抽一謂之大釐聞未能悉數歸公且沿途復有半釐小釐落地稅各名色又有查局分局驗票局及各州縣私設卡局層層派索每引一張運入黔境實收釐銀不下數十兩以致商販裹足綜黔省鹽貨各釐歲入不過十萬鹽釐僅居一半所得甚微而於川鹽銷路大有關係茲擬由川省每年暫行認解黔釐銀五六萬兩分夏冬兩季撥解以濟餉需以後如銷路日暢鹽務大有起色再行酌量多撥以昭核實如此辦理則黔餉可歸實際而川引亦可漸復相應請 旨飭下貴州撫臣通飭局卡凡遇行黔鹽釐一體免收其報部關稅悉照部則交納不許重徵並嚴禁各地方官設局私派以通商路乃為有濟且以目下形勢而論川省戶稠人眾黔省土廣人稀但使邊疆暢行商人趨利若鶩五六年間黔中人民逐漸復業口岸亦遂感興復其工作力役藉沿途店棧為生活者通計四引地不下數十萬移家就食置買地田招徠開墾相因而至殘破之區或可藉此轉為富庶雖一時未必大效而異時固可操券實於黔省大有裨益至現在川中邊引積至八萬七千有奇未完釐銀一百三十六萬六千餘兩計引積至四十六萬一千有奇未完稅銀四十七萬九千餘兩現在邊岸甫經創辦其濟楚銷路正體察情形其勢實未可遽停免致積欠終懸且恐別滋意外之事請俟川中積引銷竣再行查核奏明辦理至此次籌辦黔岸並辦計岸引地事關銷路紛煩必須多運鹽斤存儲總局方資轉運而自領引至廠販買鹽水陸轉運各郡並各總局

分局製備一切家具等項成本甚重從前黔岸暢行時西商各處設立行號運銷資本合計不下千萬始
敷周轉今官爲辦運是以一局而應無數之商販勢不能不厚集資本計非湊五十萬兩不足以資周轉
現川省庫項一空各處指撥之款尙屬籌措爲難豈能湊此鉅款而川黔大局所關亦萬不能視爲緩圖
自須另行籌措查臣前撫東時於糧運兩岸百計撙節尙有餘款可以挪借茲再四思維擬請借撥糧道
庫銀十五萬兩運庫銀十五萬兩再由臣商之湖北督撫山該省釐稅項下借撥銀十萬兩共銀四十萬
兩其餘十萬兩擬就本省各處湊借以足五十萬之數至借撥之款分作八年陸續歸還如此一爲轉
移在東鄂不過暫時通挪銀兩不致無著而川省得此接濟將黔岸興復則可爲川省圖久遠之安亦可
爲國家興百年之利至臣於庫款向屬謹慎事求核實不敢分毫虛糜此次借款如果歸還一無把握
斷不敢以庫儲有用之財輕爲嘗試亦不敢以本省應辦之事貽累鄰疆相應請 旨飭下湖北山東各
督撫臣等辦解川用資持辦想各督撫臣關懷大局夙著公忠必能竭力通融借撥共切扶持下戶部速
議具奏○辛酉諭給事中崔穆之奏直隸山東接壤地方秋收歉薄民情不靖南北驛路時有劫奪之案
瞬屆隆冬更恐貧民無賴之徒嘯聚爲患亟宜安輯巡防等語著李鴻章文格妥議章程撫卹災黎防緝
奸宄卽行認真籌辦以蘇民困而靖地方○諭前因山西河南兩省被災最重迭經降旨籌撥帑銀並截

留江安漕糧分別賑恤該撫等自能實力籌辦俾一時饑民不至失所惟念現正深秋距來歲麥收爲時尙遠仍恐青黃不接之際小民謀食維艱著加恩將山東省本年冬漕撥給山西河南各八萬石以備接續賑濟屆時卽著會同國丞李慶嗣設法運轉核實散放用示朝廷繫念災黎至意○壬戌予故安徽巡撫喬松年於臨清壽州等處建祠○癸亥諭沈葆楨奏續陳捕蝗情形預籌冬令收買蝻子一摺本年江蘇安徽兩省飛蝗害稼其屬聚地方竟至堆積盈尺經該督撫嚴飭所屬實力撲除茲據沈葆楨奏稱除蝗之法捕蝗不如除蝻除蝻不如收子現與吳元炳裕祿預商籌備飭各州縣購挖蝻子定價招徠以絕根株所籌尙妥因思本年直隸等省飛蝗甚廣亟須一體搜除遺孽庶來歲不致蔓延著各該督撫籌畫經費飭下各州縣收買蝻子俾民間踴躍爭先以期搜捕淨盡其被災處所兼可以工代賑各該督撫務當實力趕辦如有地方官奉行不力懈怠從事卽行嚴參懲處○諭前因京師入秋以來得雨稀少山西河南陝西等省均形亢旱曾經迭次親詣大高殿拈香並派惇親王奕誥等分詣時應宮等處拈香虔申祈禱十一日雨雪交加郊原沾潤此皆仰賴昊慈垂佑寅感實深謹擇於本月十四日朕親詣大高殿拈香時應宮著仍派惇親王奕誥昭顯廟著仍派恭親王奕訢宣仁廟著仍派惠郡王奕祥凝和廟著仍派貝勒載治同於是日分詣拈香敬謹報謝仍冀祥雲迭霽俾京畿及各省一律優沾以

逝 天庥而慰民望○甲子禮部奏光緒二年六月二十七日內閣抄出河南學政費延釐奏請將漢儒
劉德從祀 文廟一摺軍機大臣奉 旨禮部議奏欽此欽遵到部臣等查同治二年六月禮部奏准附
鑒 廟廷祀典至鉅咸豐十年閏三月大學士軍機大臣遵 旨議定嗣後從祀 文廟應以闡明聖學
傳授道統爲斷特恐各省官紳未能深悉歷次所奉 諭旨紛紛陳請從祀殊非慎重之道應請 飭下
各直省督撫學政恪遵十年定制不得濫請從祀 文廟並不准援案如爲 文廟中必應從祀之先賢
先儒方准該督撫會同學政詳加考核奏明請 旨並將其人生平著述事蹟送部核其 欽定書籍中
引用若干條論贊若干條先儒書籍中引用若干條論贊若干條一併詳細造冊送部不得僅據空言率
行陳請均請 飭下大學士九卿國子監會同禮部議奏等因在案查原奏內稱聖人之道在乎經籍自
秦火而後六籍散亡惟易爲完備漢興除挾書之律開獻書之路羣經稍稍出焉觀董仲舒之對漢武帝
曰非六藝之科孔子之術皆絕之弗使復進西漢治術彬彬乎近古者儒生爲之也顧儒貴明體達用尤賴
稽古傳經則河間獻王劉德其人矣臣等稽書經籍志云漢初高堂生傳禮十七篇又有古經出於淹中
河間獻王好古愛學收集餘燼得而獻之合五十六篇及明堂陰陽之記無敢傳之者惟古經十七篇與
高堂生所傳不殊而字多異自高堂生至宣帝時后蒼最明其業授戴德戴聖慶普漢永鄉康成傳小戴

之學復以古經校之取其義長者作注惟鄭氏學知古禮經出魯淹中河間獻王得而獻之康成作注參用二本從今文者則今文在經古文出注從古文者則古文在經今文出注此其大較也是侯禮古文之傳獻王傳之也古人言治春秋可無公羊穀梁不可無左氏儒林傳云漢興北平侯張蒼及梁太傅賈誼京兆尹張敞大中大夫劉公子皆修春秋左氏傳誼左氏傳訓故授趙人賈公爲河間獻王博士及光武中興韓歆上疏請立左氏博士范升等駁之帝卒立左氏學是左氏之傳獻王傳之也文帝之時詩始萌茅獨有魯詩景帝時有齊詩而大毛公亨爲故訓傳三十卷鄭康成六藝論云獻王號之曰毛詩傳趙人小毛公莒爲獻王博士是毛詩之傳獻王傳之也其他所得如周官尚書禮記孟子老子之屬皆古文先秦舊書見漢書景十三王傳兩漢經生先獻王而起者有伏勝已得從祀矣踵獻王而起者有毛萇而萇亦得從祀矣獨獻王僻在河間僅得一鄉之祀不獲登聖人之堂伏乞將漢儒劉德循伏勝毛萇之例從祀文廟以表傳經之功等語臣等查漢書河間獻王劉德本傳稱其修學好古實事求是所得書皆古文先秦舊書周官尚書禮記孟子老子之屬皆經傳說記七十子之徒所論其學舉大藝立毛氏詩左氏春秋博士修禮樂被服儒術造次必於儒者山東諸儒多從而遊來朝獻雅樂奏對三雍宮得事之中文約指明身端行治溫仁恭儉無敬愛下明知深察惠於鰥寡謹法聰明察知曰獻宜諡曰獻王等語又按

隋書經籍志云時有李氏得周官上於河間獻王獨闕冬官一篇獻王購以千金不得遂取者工記合成
六篇奏之今之周禮是也又云古經出於淹中而河間獻王好古愛學收集餘燼得而獻之合五十六篇
並威儀之事今之儀禮是也又云河間獻王得仲尼子弟及後學者所記一百三十一篇獻之今之禮記
是也伏讀 高宗純皇帝欽定三禮義疏均將經籍志此數條採入綱領中臣等綜核獻王生平誠如史
臣所劄大雅不羣而有功經傳信而有徵且大學中庸兩篇實出禮記程子謂大學孔氏遺書初學入德
之門中庸乃孔門傳授心法蓋聖學道統莫備於此二篇獻王於經籍散亡之後保殘補缺實於聖學道
統大有裨益等公同商酌擬如該學政所請准以漢儒河間獻王劉德從祀 文廟其位次應在西廡
先儒董仲舒之次得 旨如所議行○諭歷代史書皆以帝王本紀冠諸簡端我朝 列聖相承均經國
史館恭修 本紀敬謹尊藏伏念 穆宗毅皇帝文德武功昭垂宇宙業經特命開館纂修 實錄現已
進呈至六年允宜恭修 本紀垂示後昆蓋國史館總裁遴派提調等官督同謄錄請 實錄館將業已
進呈之書照副本恭繕一分恪遵編纂隨時進呈於 實錄告成後陸續辦竣所繕 實錄副本即恭藏
史館以資考證○乙丑諭翰林院侍講張佩綸奏請廣開言路以拯時艱一摺朝廷政治得失原冀內外
諸臣獻可替否宏濟艱難迭經諭令大小臣工剴切敷陳以期集思廣益本年災沴迭見水旱蝗蝻之災

偏於數省業經截漕發帑賑兼施惟念吏治有無因循民生有無怨悞用人行政有無缺失尤宜上下
交修以圖至計爾大小臣工務當各據己見切實指陳總期廣獻謨謀力去積習用副朝廷遇災修省從
諫弗拂至意另片奏風聞紫禁城東河沿有內監雜引伶人排演各戲並內務府造辦處院中買賣器雜
且有設場聚賭之事請飭嚴禁等語著總管內務府大臣立即查明如有前項情事即著嚴行懲辦毋稍
徇隱○內寅工部尚書李鴻藻丁本生母憂解任以賀壽慈為工部尚書徐桐為左都御史○賜前工部
尚書李鴻藻之本生母祭進一壇○諭沈葆楨等奏請建立原任督臣專祠一摺原任大學士兩江總督
曾國藩前駐江蘇徐州督師剿擒軍務倥傯之際清理湖田培植學校洵屬功德在民既據該處紳士
懇請建祠著准其於江蘇徐州府城建立曾國藩專祠由地方官春秋致祭○己巳諭翰林院編修何金
壽奏直隸各屬荒歉者多州縣捏報秋成分數著李鴻章即速派委員再行詳細查勘如有被災過重者
即設法拯救以蘇民困○諭本年河南亢旱被災甚重迭經降旨撥款並籌給糧米賑濟第恐該省辦賑
官吏從中舞弊實惠不能及民著派河東河道總督李鶴年周歷災區將該省賑務認真稽察如有辦理
不善及營私中飽等弊即行據實參奏陝西亦被旱成災現在籌備荒政事務殷繁著派前布政使張瀛
幫辦陝西賑務○庚午諭御史董傳翰奏輪船招商局關係緊要急須整頓一摺據稱該局每月虧銀五

六萬兩因置船過多載貨之費不敷經費用人太濫耗費日增等語輪船招商局原以收中國之利權必須有利無弊方可以期久遠著李鴻章沈葆楨通盤籌辦於該局經費權衡出入認真整頓毋得稍有虛糜嚴諭該局不得以辦公爲名位置私人濫行收錄並飭令該局商總和衷辦事勿務虛名○御史恭鑑奏慎選舉所以重名器加職銜原爲予褒獎內外大小文武官員一切升階加銜統歸戶兵兩部遵照例章核辦昭示畫一不容稍有歧異惟內務府官員升補本府各項之缺向不歸吏部查核而加銜保獎亦遂因之不咨吏部伏思名器攸關凡屬臣工均宜慎重查吏部近年奏定新章京官四五品者不得逾三品乃內務府竟有以員外郎等官加至一品銜者僕從軒昂赫然卿貳致堂司漫無區別翎頂章服不待銓衡旋卽僭越殊失 朝廷慎重名器至意亦與吏部章程兩歧應請 旨飭下內務府大臣嗣後保舉各員官階升銜等項均照各衙門成案咨由吏部遵照例章核明辦理以歸畫一 上諭御史恭鑑奏內務府保舉各員官階升銜等項與部定章程兩歧請飭山吏部核辦等語著內務府大臣嗣後於保舉官階升銜等項均咨由吏部遵照例章核明辦理以符定制而重名器○壬申諭前因會國荃奏已革山西巡撫林壽圖以前詳西征餉項銀數並非朦混取巧置辦當經諭令戶部查明具奏茲據奏稱詳查前後奏咨成案山西省月協西征餉銀實係五萬兩同治八年二月間經該部核定奏明後歷屆均照此數

僅解十年十一年間前任藩司張樹鑒以西征餉數不符詳請咨部查覆均經該部詳細咨覆有案等語
林壽圖於奉撥西征月餉並未詳查奏咨各案既經體混於前又復固執於後殊屬冒昧業經革職姑免
深究山西巡撫曾國荃於林壽圖詳文未經覆核明確率行入奏亦屬不合著交部察議○諭前因京師
入秋以來雨澤稀少山西河南陝西等省亢旱均未得有透雨曾經兩次親詣 大高殿拈香並派惇親
王奕訢等分詣 時應宮等處拈香虔申祈禱現在節逾霜降尚未渥沛甘霖朕心尤深寅盼允宜再申
虔禱用迓 天庥朕於本月二十二日親詣 大高殿拈香 時應宮著仍派惇親王奕訢 昭顯廟著
派恭親王奕訢 宣仁廟著派惠郡王奕祥 凝和廟著派貝勒載澂同於是日分詣拈香○甲戌裕祿
等奏請飭內外臣工勸求更治 上嘉許之○乙亥諭劉坤一等奏運米平糶請免稅釐一摺本年廣東
江水漲發廣州府等屬被水成災現經該督撫派員前赴江蘇上海鎮江等處採買米石運回平糶以濟
災黎著照所請將經過沿途關卡應完稅項釐金概行寬免○丁丑諭禮部奏前任工部尚書李鴻藻之
本生母姚氏病故因大宗無人懇請持服三年一摺著禮部議奏○庚辰以恭修 穆宗毅皇帝實錄全
書過半予在館人員獎叙有差○李慶翱奏河南學政臣翟鴻璣以豫省被旱歉收捐養廉銀一千兩助
賑得 旨翟鴻璣著交部議叙○辛巳以恭修 惠陵工程完竣予奕訢等獎叙有差